

兩浙輶軒續錄

兩浙輶軒續錄卷四十九目

吳修祐 一屈元炘 吳廷楨 施浴升 林鍾嶠

秦樹敏 胡价人 郭寅生 龐鴻翥 孫元竣

朱世標 凌介禧 高辛仲 姚陽元 馮子昌

葉元坊 胡念袞 田逢年 馬廣良 馬秉南

黃方慶 王維翰 任席珍 徐學誠 項瑣

陳誥 諸可炘 王汝霖 王麟書 陳光煦

章德藻 夏曾傳 丁午 查澐 吳肇嘉

汪樹基 馬蘭芬 嚴錫康 鄭兆鼎 吳鉉堂

閔珏 袁秉彝 凌丹陛 張炘 蔡鴻鑑

孫康友 胡邁 孔廣森 歐景岱 范榮棣

沈兆圻 陶在廉 王再增 孫樹雲 許炳森

許傳霖

馬化南

裘錦章

支廷玠

周紀勳

周誥

張綺

葛晚園

葉啟楨

張經銘

程鴻達

沈寶瑚

林用霖

趙瀛

趙祖歡

陶熙培

傅振湘

兩浙輜軒續錄卷四十九

督學使者潘衍桐訂

吳修祐

初名獮虎字穎士嘉善人同治癸酉舉人著軒下吟編

偶望

小橫略約路紆斜翠閣紅樓住幾家細雨霑衣人不見隔河

一樹紫荆花

屈元炳

字星階石門人同治癸酉舉人大挑教職著棟華樓詩稿

譚逢仕日星階雅好詩古文辭及方技諸書秉質穎異輒多會悟嘗手造刻漏測晷仰儀隔水量田較準南鍼羅盤諸器識者以爲變通古制應物適時

題晚萱苦節圖

海昌俞湘梅母沈氏

瑤池冰雪千秋白人閒歲暮知松柏十年苦節甘如飴賴有
佳兒慰朝夕篝燈課讀秋夜長妖星忽見飛櫓檣江南鼙鼓
喧天起眼見烽煙逼故鄉攜家擬作桃源避踏遍武陵無樂

地逃秦無計且歸來夜深風雨黃巾至城頭畫角聲啾啾日
月黯淡山川愁將軍不學嚴顏死壯士甘作鍾儀囚誰知開
氣鍾巾幗抗聲罵賊志何烈凜然節概勝男兒睢陽之齒常
山舌碧血沈埋誰復知鄰人述此雙淚垂恩勤何況關毛裏
此恨終天無已時聊將一語慰君憂彤管芳徽千載留古來
苦節天能報萱草雖萎蘭桂稠武夷山下丹青手繪作畫圖
傳不朽孝慈節烈一身兼於古無前今無偶

讀晉書

自來眞英雄能識假名士古有華子魚孫郎執如豕深源名
亦高受困桓元子空山拙可藏三徵三不起胡爲慕世榮一
朝出而仕束手窘設施咄咄空復爾處事正自難近觀穎有
泚在山稱臥龍出山似鼯鼠乃知臙仕途有如鏡與砥妍醜

纖毫呈堅脆頭刻試名實能相符古今兩人耳南陽有孔明
平生管樂比東山安石公清風滿杖履感激許馳驅鞠躬期
一死社稷寄安危功高名亦美才德謝二公肥遯真得計寄
語山中人人言良可畏莫貪一時榮反貽千古恥

吳廷楨

字槐庭長興人同治癸酉舉人著曉巢詩鈔

孫德祖政略威豐庚申之難廷楨自以縣學生義不爲賊屈將死之賊投以刃傷其腹得救而蘇賊卒歸理舊業所著詩文極富手藝盈尺沒後或竊以去此帙則鈔從零縑斷楮中者

暮秋客邱誌感

風瑟瑟雨瀟瀟青燈無燄人寂寥
熒熒隻影託孤館寒威透骨淚痕
滿淚痕滿寒無衣哀哀征雁愁不
飛嗟我母在日巖巖尋師辭母出
未秋阿母先寄衣寒暑咸宜無一
失嗟嗟母初凶兒因覓食羈他鄉
秋深夜冷衣誰寄蟋蟀淒涼語近
牀

見人羞自說無服僵坐忍寒強夜讀吁嗟乎人與我本同情
我與人本同生人皆輕裘暖絮適其體我何爲乎號寒不敢
作悲聲蟋蟀遶牀嘯似泣風雨淒淒夜更急夜更急寒難持
此時阿母知不知靜言思之淚如雨聳肩哭倒寒窗裏

嘯鳥行

老鳥啞啞嘯罷日正西日正西兮小鳥至老鳥含哺展雙
翅小鳥始歸巢老鳥立樹梢靜俟小鳥睡且熟老鳥乃就巢
邊宿相彼鳥兮有何知愛子之意尙如斯嗟嗟我雙親生我
彌愛珍愛珍直欲置掌上嬌養由來不敢抗朝索餅餌探父
囊暮爭梨栗喧母傍有時忽患驚風疾父母中夜起徇徨六
歲隨父宿父勉兒讀兒不讀兒不讀父怒日時時滾地作嬌
哭父視兒哭重開顏欲責不責憐癡頑誰知略識之無字父

究兒債辭人聞父叵母泣無朝暮母泣兒呼母不顧母不顧
兮兒不知猶自牽衣作絮語阿兒作商去母始減憂慮勉兒
讀書繼父心歲歲寒衣自裝絮兒衣常厚母衣單西風吹母
母忍寒母衣寒雙鬢槁猶恐兒悲常諱老待到身危疾病侵
尚持兒髮囑兒嫂吁嗟乎昔年父叵兒十一今歲母叵兒十
七稚牛莫竭反哺誠風木悲深空掩泣白雲西望墓門孤蕭
蕭宰木號寒鳥寒鳥號宰木拱往復蓼莪篇悲哉遺體重

環碧軒玩月有懷箬溪諸友

陽鳥西墮空城寂明滅殘鐙倚孤壁滿庭花影悄無人風動
竹梢聲浙瀝軒窗面面傍池開俗客去盡明月來手招明月
共我坐清光皎皎無纖埃如此良宵不多得誰把千金買一
刻無端觸我故鄉思良朋想望疑顏色濟陽才子氣最豪斗

酒百篇詩興高風流逸少亦佳士下筆千言揮彩毫畫眉張
做多才調君房言語天下妙其餘談笑盡名流羣從翩翩更
年少論文樽酒樂非常一時人物概吾鄉笑我客中寂無侶
縮地不遇費長房春宵苦短更籌送風露黃昏薄寒中漸看
涼月下花梢獨抱孤衾覓殘夢

荆灣夜泊

徹夜北風號孤燈一葉舸灘聲猶繞枕冰力漸封篙人語荒
村寂雲陰古岸高倚舷寒不寐對影首頻搔

施洽升

字紫明號旭臣文銓子安吉人同治癸酉舉人著金鐘山房詩存

吳鍾奇曰紫明天資高邁學有根柢所作詩古文隸卓然自立屢試不第庚寅春以病卒於京邸無子時人哀之爲扶榷歸里並哀刻遺集以傳其人

題丁季莘紅蓼山莊

言尋紅蓼花忽到幽人宅流水抱如環吟聲出茆脊濛濛遠
岫青渺渺孤舟夕何當結草廬長對素心客

滄州王氏婦詩

翩翩池中鳥中有鴛與鴦鴦不獨宿比翼自成雙感此矚
天表哀哀孤飛鴻孤鴻一何苦萬里求賢雄彼姝誰家子麗
貞何矜莊十九字良人琅邪大道王雍睦處鄰里盡心奉姑
嫜方謂永相守長與相扶將何期未一載株累難具防良人
謂新婦明日當遠離歸來未可知累卿守門楣新婦聞此言
未語先涕洟上有白髮母下無黃口兒君今出門去賤妾將
何依良人謂婦言事理固如斯官法不可當余當終避之明
日便遠去不久將自歸新婦大悲哀上堂白阿母阿母留不
得泣涕零如雨新婦謂夫君君歸未有期妾當忍死待幸勿

牽心懷整君衣與裳理妾刀與尺何以明妾心教君永相識
君行如轉蓬妾心如精鐵轉蓬無定根精鐵終不滅以此縱
君衣便當送君別良人出門去一去三十年光陰何在荏苒春
雨復秋煙婦姑苦相守艱辛難具言長跪白阿母兒願往尋
夫阿母謂新婦汝計無乃疏汝夫知何在南北與東西關山
邈以遠汝去將安之汝若再不歸我當更誰依鄰里聞此言
登門共謂婦汝志良可嘉其奈有阿母不得輕自離還共長
相守戚戚復戚戚忽忽歲月徂阿母已云凶婦心悲何如甞
勉舉大事前志終不渝即便告鄰里妾今當遠行鄰里難再
留有淚同沾巾鮓衽重置詞再拜託孤墳更無他戚屬以此
累高鄰銜環與結草相期報大恩驚我嫁時襦質我蛺蝶裙
金釵何煜煜廣袖亦翩翩將此爲誰容靚之摧肺肝舉以充

旅資可用歷關山東鄰來餽西鄰致餼糧謂當早來歸借
夫還故鄉行行逾嵩岳展轉涉衡湘長路何漫漫良會終茫
茫聞關二三載淚嗚于萬行復至濟南府日暮大風雨哀號
歧路隅何來洛陽賈囑我背上書爲我立踟躕前來致問訊
自謂識兒夫憶昔五年前邂逅鐵嶺開汝往彼中尋或可見
容顏吾今助汝資速行北出關婦聞泣跪拜再拜謝恩人更
向鐵嶺去白日迷黃塵朔風砭肌骨冰雪何峻嶒十步有九
坂虎豹夾路蹲高山上極天下臨千丈淵日飲道旁冰夜棲
山下巖迥邈出鐵嶺已是游牧地牛羊蔽山野民居皆崩毳
茫茫投繭足不知幾何里到此路途窮中心猶未死逢人問
消息方語難可解更復何所望如石投大海欲生不得生欲
死死未能生難返故鄉死或見夫君且復向前行悲風送哭

聲哭聲亦不遠豈有同情人尋聲前行去東頭第三家中有蒙古婦血淚流滂沱向前聊致詞蒙婦通漢語未答更嗚咽頭垂不能舉妾姓曰吳郎漢吉爾門氏一十五年前嫁此他鄉子方冀共白頭何期昨暮死婦聞心愈悲告以前後因蒙婦還致問君夫何姓名一夫來自南是君同里人婦心轉驚悸更向蒙婦問姓名一一同吾夫果然信入戶拊逝者陳尸猶未寒萬里贖一面了此數月緣卻看身上衣衷衣敝未脫開襟見鍼綫猶是婦手迹夫行如轉蓬妾心如精鐵在尋三十年刺字猶未滅蒙婦正色言難得君能來即可返故鄉歸爾夫君骸婦聞連唯唯君今將何如蒙婦仰頭答君何視我殊君能尋夫骨我能殉夫匹願同夫骨歸合葬先隴旁敬以此爲託泉下不相忌婦乃驚相阻願與君俱歸蒙婦色黯然

此事容徐思反身幕後去託言將治炊逾時不見出自懸高
樹枝鄰里得聞之競前來問訊哀聲動部落家家爭贖贖贈
婦雙明駝載柩還鄉里鄉里聞婦歸老幼驚迎視鄰右聞婦
歸悲哀不能止連名報州牧州牧敬還悲具牒白大府大府
深異之孝子尋父骨在昔有其人貞婦尋夫骨古今曾未聞
奇行有二婦此事終不刊薄俗得二婦真足勵懦頑青青冢
上柏有鳥鳴青鸞悲鳴恆達夜聞者皆長嘆我爲作此歌哀
感不能終留示後世人傳之永無窮

林鍾嶠

字仲員號壺峯鄞人同治癸酉舉人

秋日晚眺

空山日已落策杖踏煙莎宿鳥爭林墜微蟲向晚多秋聲喧
在樹雲意淡生羅坐石清流畔西風老芰荷

秦樹敏

初名樹銛字秋伊號娛園會稽人同治癸酉舉人大挑教職著娛園詩橐

孫德祖曰秋伊能詩善畫居小阜部有園亭之勝是日娛園與山陰王詒壽肩未同里馬廣良幼眉爲總角交凡郡邑知名士過臯中者必掃徑歡迎流連觴詠詞治初余以經燹家毀就之卜鄰于是吾師文孺曹先生及山陰周光祖錫侯蕭山蔡以瑞季珪同縣陶在路仲梓方琦子頴相與結社賦詩互爲簪錯是日臯社而同縣孫垓子从爲之長實提唱之三十年來淪區殆盡惟余及仲彝在耳錄諸君遺詩不任人事滄桑之感也

冬夜城東歸舟

沿郭歸塗迂江空朔颿靜殘雪生遠輝落木山無隱迢夜氣
驟嚴荒墟人迹屏爭匯喧過航戒蹟客跌穩微茫江火明隔
水閃空影假寐怨衾鐵起坐情耿耿瞻衡促舟子雙櫂劃波
緊

爲何吟語畫梅齋壁題句其上

記過君家點也宅春風同醉羅浮雪韶光過眼九十強把臂

吟堂復佳日堂深春盎酒霧濃過雨溪山簾幙碧花彩新拓
十笏寬寸蘚未疥滄洲壁興酣潑墨染古香亂插繁枝障寒
月瓊葩雕雪千釘攢鐵幹擎雲一株屹水曹東閣見此樹禿
管曾揮三百尺從君掩關冷索笑繫余自寄飛鴻迹枝南枝
北春復春落花不唱江城筵

柳姑祠

春風祠樹噪靈鴉渺渺仙雲護鈿車三月明湖波瀉黛六朝
殘夢柳飛花青山門外聞湘瑟黃竹江干唱越娃最是粉榆
簫鼓裏夕陽煙水泊漁槎

舟行絕句

涼砭詩骨怯秋衣小艇衝波過釣磯一路蘋花香不斷紅蜻
蛉傍槳牙飛

趙忠節公遺集題後

模糊碧血灑吳鉤，浩氣如虹射斗牛。
不恨艱難遲一死，卽看歌哭亦千秋。

龍髯地下攀猶及，馬革生平計已周。
慘澹風雲若雪路，也應憑弔感旄邱。

打魚歌

霜曦杲杲冰膠河，罟師擲檝掀層波。
長篙刺水爭撈蛟，鼉徒窟愁張羅浪。
花濺雪填旋渦巨，鱗數覲常鱗多。
千頭戢戟爭相摩，傾潭聚獲悉索苛。
赤鯉跋扈織飛梭，游俯攫道呼奈何。
鳴榔一鼓空蚌螺，鯉風盪漾白日雉。
蹋江歸憩江上坡。

張綱牽魚日踏江

漁車泊岸高峩峩

朱侍講

適然

書堂夜飲卽席賦呈并悼令弟鎮夫

衍緒

紅藥壓闌春豈長木天下直如江鄉金尊醉邀明月共玉尺
閒把花枝量載吟脊令意振觸卻聽雛鳳聲鏗鏘西冷夜船
詩夢杳不堪風籟聞山陽

古淪周孝廉

星雋

詢及鏡湖之勝口占禽之卽題其索

畫桃花簾上

曲曲清谿古若耶垂楊風送釣魚槎看山記得歸來晚紅近
桃花是酒家

大沽望月同施均父陶子縝高仲英白叔兄弟

鑿影空毫髮虛舟天際橫無邊滄海月不斷夜潮聲孤嶼宵
然碧銀河相向明公然犯牛斗今古若爲情

上座主宗室竹坡先生

一鳳翔霄漢千人見羽毛校經劉向志託諫屈原騷北海尊

常滿豐城劍不韜涓埃知有補未忍

聖躬勞

當代龍門重英風鶴骨奇雅懷在山水餘事寄歌詩耿耿長
無寐滔滔不可維後生愛名節非獨戀恩私

都門旅夜簡懷孫子九丈王眉叔馬幼眉陶心雲諸子
碧海青天自古今相思明月最知音關河浪跡悲歧路風雨
端居憶瘦吟涉世分無干祿技入山儻遂著書心文章毀譽
渾閒事賸有囊中未碎琴

下第南歸留別都門諸知己

子規嗥徹酒微醺芳草天涯易夕曛豈有春陰回橋水斷無
霖雨屬閒雲飛花猶及茵邊墮羌筵難禁客裏聞欲滌塵心
向何處故園田水正云云

榆莢飛殘不賣愁青衫瘦馬出

皇州卻因歧路悲勞燕還擬乘槎犯斗牛去國倍深文字感
入山敢及稻梁謀等閒天際歸帆速嶽麓驅車負壯游

彥清歸自京邸過訪草堂兼述悉伯郎中汝翼編修近

狀

東歸等是倦游身花落空山幾度春碧柳相看情似昔素衣
重檢淚猶新天涯爭羨銀鱸美故國誰憐金馬貧斫劍從君
歌磊落出門西笑又何人

奉和子縝過訪娛園之作卽次元韻

鯉魚風起長夫容漢水吳雲憶別蹤左顧漫勞迴畫榜論交
眞可比寒松詞吟白雪重題石衣換金貂政禦冬

時已服闋
將於明春

之都聞道養心堅謝客行窩還借碧蘿封

胡价人

字雪峰餘姚人同治癸酉舉人

施繼常曰雪峰與其兄芝麓師事蔗溪並以詩文見長然芝麓喜冷淡有灞橋雪驢圖雪峰愛絢染有春園夜坐圖其志趣亦畧有不同矣

題施蔗溪夫子且過居詩畧

往哲淪亡後

我鄉潘鏡夫鄭雪樵前輩以詩擅名騷壇孰主盟先生誠砥柱吾

道此干城藝絕人偏忘時窮節愈貞何堪誦遺集懷德淚頻傾

郭寅生

字儒仙烏程人同治癸酉拔貢

凌文瀾曰儒仙師天性孝友父卒哀毀骨立終三年喪未嘗見齒母遭賊難遍覓遺骸不得幾不欲生事兄嫂如父母家貧授徒必勛以品學人皆重之

謁胡文定墓

教澤荆南望最崇遺碑表墓遇歐公遊偕上蔡傳伊水緒聞

延年起晦翁設席談經榮朵殿分齋課士式巽宮挺然獨秀
推松柏取譬嚴寒雪意融

謁衛正節墓書感

苔封殘碣不堪摹毅魄長蕙有綠蕪正氣尙留南渡末貞魂
誰弔北邙孤厓山亾國遺忠恨雪水移居絕宦途客我松楸
陳一奠還愁遺隴走樵芻

龐鴻鸞

字楚秋玉環人同治癸酉拔貢

桃花嶺

距玉環城二里在鑄屏山東

桃花嶺上楓干樹桃花嶺下人家住空山猿鳥皆忘機白雲
無心自來去左連密鷲右東青高峰絕頂凌滄溟俯瞰扶桑
出紅日一輪皎皎懸銅鉦照見松柏參天高長風洶湧生波
濤波濤萬疊渺無際倒海排山聲怒號

孫元峻

字瘦石號峻卿錢塘諸生著瘦石庵詩鈔

陸以增曰峻卿性伉爽有奇氣喜讀少陵集父歿以所遺書籍家產讓昆季子然一身落拓而卒

登吳山感懷洛卿舍弟因寄四首

吳山何崔巍浙水西東流
摳衣上其巔四顧集百憂
天空萬里見冥冥青雲修安得乘長風快然愜所求

憶昔咸豐閒煙塵昏天馭
小小不識苦離亂全天遊
蹉跎忽壯歲潦倒非人謀
豈能蠖終屈會須鷹脫鞴
振翮凌虛無一覽隘九州

極目望天際滄江日夜流
盈盈一水隔動輒多葛藤借問女

牛星何殊參商雉遙知太山上

海陵城中有土墩土人呼爲太山上有岳忠武王廟相傳

忠武練兵於此此意還相侔

天風從北來飄飄吹衣襟
男兒橫四海功名當千秋
呢呢兒

女態矻矻英雄修相期各努力毋爲牛後羞

清泉馬貞女長歌

男兒重義氣女子珍峩岷十年一字不可改天荒地折空傷
神湘娥嘯哀帝女集前山古竹痕鮮新深恩那必在承事焉
知伯樂猶吟呻側聞鬚眉客白日當青春一編故簡勞往復
錙錄計較能紛綸妾心有如廢井水銅瓶久絕生凝塵若教
持劍向人去未解還持卻照身

朱世標

字存齋海鹽諸生

縣志世標性孝友少孤母老病侍湯藥每夜必起寒暑無閒

山行

一路草芊縣人家傍水邊穿林逢野鹿倚樹聽鳴蟬古木橫
山徑清流瀉石泉扶筇一眺望直上翠微巔

凌介禧

字香南號少若烏程諸生善讀經批說十六卷凌氏詩存十二卷少若詩文彙若干卷

鳳笙閣遺址

尚書賦遂初高閣此幽居入檻山平遠盤珠水靜虛西溪三畝宅南面百城書鳳吹留遺韻嫋嫋境宛如

高辛仲

字德醇號澹人歸安人善慕陶吟稿

題戴海槎春江垂釣圖

君不見桐廬江上秋水生釣臺千仞俯江清又不見西塞山前春水漲鱖魚正肥桃花放嚴子陵兮張志和一羊裘兮一綠蓑天子當時空物色一笑相逢臣不得三公不換好江山萬事無心一釣竿君家新詩句有神始信江湖屬散人今君畫圖無乃同譜出春江一釣筒偶臨流水如明鏡遙望長橋挂彩虹君居此橋側持竿日坐東風裏鷗鳥忘機隨浪起魚樂人

樂爾未知妙詞深得濠梁旨翻身直欲狎波濤乘槎海上氣
自豪何年破浪乘風去更向滄桑一釣鼈

淨梵院訪肩雲老友

紅塵飛不到一徑入煙霞時有幽人至相將踏落花聯吟僧
入社耽隱客忘家欲問窮通理生涯指釣槎

暮春送田少尹解組歸白下

門有驪駒不可留垂楊踈地綠陰凋十年循吏雙蓬鬢兩袖
清風一葉舟薄宦心同江水淡還鄉夢比櫓聲柔而今惟有
甘棠樹長蔭溪南翠欲流

鄭君守梅以詩見贈次韻奉酬

世亂年荒奈若何山林鐘鼎兩蹉跎愁中細數親朋少病裏
閒消日月多願我風塵凝面厚羨君星斗滿胸羅楚人一炬

憐焦土只合巢居賦藪窩敝廬於去秋被賊燬

姚陽元字舒堂文田孫歸安人著春草堂稿

姚觀元曰予弟舒堂性穎異詩文皆詳贍有法嘗撰剛日柔日讀書志未就遺文亦散佚存者僅詩一卷因刻

先世遺文取此附入題曰春草堂取靈運詩意也

泰岳篇輓彭烈婦并序

烈婦山左孫氏女適淮水彭氏夫遠出以奪嫁死之

巖巖泰山神靈之府浩浩淄川正氣斯聚聿萃其秀聿篤其

祐是生名媛為世之矩

其生伊何興公之族幼而貞慧長斯善淑如桂倚巖如蘭在

谷其馨伊遠其志伊肅

厥維彭生明德之後學紹匡劉名參濤秀譬彼良馬終超天

廐允矣清明舊惟昏媾

館我貳室嘉禮旣成君曰歸止女亦有行遠我父母離我弟
兄淮水湯湯及爾徂征

旣見尊章謁我于廟棗栗斯陳蘋蘩是效彤管思箴素練莫
誚虔恭中饋柔德有耀

楊柳依依拂我高樓君子于邁汎彼柏舟攀條贈君送君路
陬勸哉夫子無爲親羞

采采流水鬱鬱芳塘中有飛鳥其名鴛鴦一日離羣山高水
長髡彼兩髦寤寐不忘

猗彼女蘿其葉漙漙黽勉從君爰得其所哀哉觀閔奪我嘉
侶從君九原自茲千古

孔雀東飛伯勞西去幽恨靡窮貞魂永逝我有銀管比于竹
素庶幾後昆式昭令譽

馮子昌

字南賓號也白慈谿諸生著留耕山莊詩稿

讀史三首

我愛信陵君濁世佳公子侯生好奇計願受公子使如姬感
大恩願爲公子死目無虎狼秦何況一晉鄙朱亥功方成毛
辯謀復起六國惟此君乃稱眞得士吁嗟齊孟嘗雞鳴狗盜
耳

齊國公孫宏牧羊東海濱四十治春秋五十猶泥塵六十徵
對策天子手親掄後忽爲丞相封侯曰平津以茲多慾主遇
茲多詐臣於焉益固結視之同一身願已猶布被詎肯厚贈
人故人許丞相丞相瞋惡賓故者失其故親者失其親親故
尙棄置何有相知新乃知開東閣良非吐握眞

伊尹無鬚眉周公壯斷櫛云何東方朔齒目自云奇孔子經

之宗左邱史之祖云何東方朔三冬足自詡先生蓋避世議
論多譎詭畜之以俳優不足以爲恥猜之以神仙不足以爲
喜漢廷連睢尻總作蚍蜉視首尾不全露應龍固如是

登大孤山

亂雲破碎山風送飛壓懸崖石動一峰壁立青插天天帝
醉歸遺酒甕要將日月強吞吐留與煙霞閒補空豹斑駁落
黏苔錢鷺管橫斜溜乳潭屹立不受秦皇鞭回頭欲鬪造化
鞭我昨遊徧小孤山已駭高峰尖裏糗青蓮華湧觀音巖鬼
斧鑿開山骨縫振衣高跨百尺虹舉手欲招千仞鳳靈宮百
級陰風號刀劍森羅神鬼闖縱觀此峰更奇險一笑冠裳鞅
奴從巖巔亦有諸神祠仰瞰飛雲出檐棟下吸江水爲酒泉
賞奇呼朋飲白痛手擲杯琰祝山靈指點前程醒幻夢祝罷

拜石石點頭一聲鐵笛臨風弄

早春送潘生歸山陽

東風旋旋午陰熱廣陵春濤白如雪
橋頭柳枝暗青發送君
還家爲君折君言還家不得意
萬里煙塵黑貂敝南天躑躅
冬作花巖晚空山溼鄉淚我聞君言拂衣起
丈夫窮途心不
从君不見淮陰市上乞食兒壯歲飄零亦如此

道中卽景

出郭百餘里四圍山作屏斷橋殘月白
古樹暮雲青野鶴鳴
秋圃孤鴻落遠汀陽關無故友衰柳亦多情

潛陽城春眺

青青西郭外一片遠山明芳草綠成海
野花紅上城鴻歸孤
客夢燕語故鄉情春事已如此韶華空復更

葉元坊

字麟言號磊杉慈谿人著意雲樓詩一卷奇音閣吟草一卷

定水寺

清翠撲闌干幽篁露未乾
四山溪水落六月草堂寒
鐘梵更空寂盤飧共懶殘
一林清話罷隨意弄漁竿

自定水寺度雁鴻嶺

紆折入險邃旋轉無平岡
松枝層級上倒垂鬱青蒼
煙靄噓成片元氣連混茫
巖花抱孤豔光風吹芬芳
磴勢互復斷湖流面相當
此中帶嵐影泛作晶碧光
眞幸能坐照大化無隱藏
卽此溪流響冷然清韻長

登長溪嶺

獨行殘日下空山
樹色炊煙曲水彎
兀立孤峰一回首
萬家明滅亂雲閒

胡念袞

字仲遠號補史鎮海貢生著逸圖詩鈔六卷

舟中作

一棹溯江邊
田家起夕煙
瓜棚低壓水
魚箔密妨船
翡翠閒
栽柳蜻蜓慣
刺蓮客愁何
自解瓶有酒如泉

田逢年

字稔生山陰諸生

家傳畧稔生幼喪母事父有孝行十歲能詩性磊落不求仕進惟酷好山水弱冠父歿遂隻身遠遊後以古學受知徐學使樹銘晚年精究天文參註七政歷象諸書未竟而卒

重過爛柯山有感

卅角曾經此地過
耆年重到鬢雙皤
滄桑世事何須問
我亦棋殘欲爛柯

馬賡良

字幼眉會稽人著鷗壺詩一卷遺稿三卷

孫德祖序畧君平居篤倫理務躬行一應鄉舉不售輒棄去於先秦兩漢諸子百家靡不博觀約取尤精史學

爲文成一家言以其餘事溢爲詩歌體

裁莊雅格律峻整具有風人述則焉

譚延獻序畧幼眉覃思自精專力爲詩窮極正變五全

一治入音成樂若性若習若忘若遺自成鷗堂之詩而

羣言

如廢

陶方琦序畧鷗堂才秉孤峻結構粹潔侷介是持汝鵠

不雕桐含清輝勉紹正始遠守先規矜然不滓葭計諧

俗疎年煅性

窮而益工

古意

耿耿牽牛星迢迢隔銀河悠悠遠行邁我勞竟如何徒侶亦
已稀崎嶇一何多亦知道里艱策蹇聊且過梁燕棲舊巢林
花發故柯微物尚有歸吾生甯蹉跎江水日夜流浮蘋託其
波守此貞白心邊能知其他

露下草木腓蟋蟀悲自語深閨有少婦寒鐙鳴機杆低頭發
長嘆獨夜無伴侶不知何幽怨但覺情淒楚人事遞變易中

懷信難訴生長在貧家誰能不辛苦

朝陽媚幽花和風引芳草春氣日以深春色日以老朱顏若
朝露能得幾時好曉起擘明鏡默默傷懷抱豔色世所稀畫
眉苦不早夫婿金閨彥鄰婦正嬌小明月入羅帷夢逐五陵
道

美人有青琴獨夜理瑤徽不惜臨風彈但恐知音稀知音亦
不稀夜深行人絕珠燈照洞房美人抱琴泣

朔風振疏林白日易西偃急景凋殘年空闈獨懷遠寸心如
駿馬馳驅九折阪歡來暫能眠愁至詎肯飯自惜千金軀常
恐容光損低徊對明鏡淚落終難返無生安可冀有情長縈

縈

觀潮行

天風莽莽海色開廣陵八月秋濤來欲流不流江瑟縮將走
未走石徘徊一綫潮頭天際白隱隱遙山見微雪轉瞬化作
羣鷗飛水面拍拍翅腳齊須臾突出魚龍陣三千練甲排牆
進電掣雷轟氣不平銀厓崩豁乾坤震時無錢王水犀弩潮
來誰敢撓其怒獨有長年振柁工輕舟一葉相吞吐潮頭瞬
息過百里兩耳潮聲猶未已呼吸終歸造化功文種伍員那
得爾秋空木葉下蕭蕭潮平江靜青天高歸舟欲賦觀潮什
安得詩情爾許豪

書感

千村萬落盡蓬蒿白骨皚皚戰壘高太息有生皆虎口可憐
無死不鴻毛關西銅馬稽誅久河北官軍屬望勞自是天心
償浩劫少陵野老漫悲號

海舶卽目

餘皇落日昏放眼極乾坤霽海琉璃席霞天瑪瑙盆往還帆
力健生死柁權尊賴有屠龍技風濤未敢喧

乞者行

乞人餓半死不空山側身上百結衣面黃無人色雙睛深
見睚兩足瘦露骨自云富家子良田連阡陌平素戒垂堂干
金守遺澤所飫厭珍羞所御薄裘葛一旦遭兵燹坐見銅山
失奔走已三年妖氛未得息父母凍餓死妻子皆淪沒孑然
餘一身欲歸已無室有田不能耕升斗何由得哀哉填溝壑
暴露無人識

山有猛獸行

深山絕斧斤時時長草木日以長猛獸行相逐誰辨豺

與虎但聞食人肉有時夾路躑躅電光慘橫目吮血磨鋸牙白
骨動盈束昔年遭喪亂盜賊時往復流血殷原隰積骸滿山
谷今年返鄉里差欲謀餽粥誰知造化心殺人猶未足鬪饑
對月舞冤鬼臨風哭黃昏無行人柴門敢獨宿生死亦有命
誰能不穀觶渡河事偶然終賴長上福

窮民歎

去年官兵至殺賊龍山邊賊去旣已遠家室亦言旋言旋豈
不喜無奈時勢遷空山百餘里一望無炊煙逃亾無重貨有
命誰能延三年苦飢凍十不一二全側身望隴畝生草長過
肩貧病不自保誰復耕其田幸賴

皇恩溥今年租稅蠲雖無溫飽樂猶得免撻鞭詎知府帖下
樂輸催新捐催捐詎得已養士爲民先養士以衛民民豈敢

自便朝賣竈下磚暮賣牀頭椽衣食安足計輸此樂輸錢歸
來餘破屋窮臥長呼天

湯鵬鐵畫歌

并序

鵬乾隆時常州鐵工以鐵畫肖物閒逸類名手寫意
世稱仙受倘然畫今多有之拙劣率弟子做臨真跡
百一也

鐵汁淋漓潑墨水硬畫盤空不著紙荆關變法未悟此湯鵬
戛戛造奇理作畫意在鑪錘先水渲火刷生姿妍山川花鳥
擅能品九州象物泣神鼎螺金屈曲懸秋堂衰燈顧影融堅
光椎指人工奪天祕此中疑有精靈藏六十年來珍尺幅風
帶水衣皆碌碌聞道江南白紵山弟子至今能畫肉

送子九丈之建甯

枕椰陰裏路漫漫此去東甌夏臘殘誰道關河驅馬易應知
貧賤杜門難齒當衰暮心何壯地入炎荒膽轉寒知有向平
婚嫁願蠻煙瘴雨勉加餐

時挈賢郎季章就婚周氏

舟夜書感

木葉蕭蕭下大江扁舟獨夜氣蒼涼明星幾點月初墮孤雁
一聲天正霜不分亂離空世業卻教生計誤辭章江湖飄泊
成何事潘鬢刁騷暗自傷

何吟梧

鏡源

齋壁畫梅傲昌谷體

銅瓶水渴東風僵羅浮夢斷酒不香鼈背湘妃墮嬌影的的
春愁凍青粉淋漓古墨生槎枒何郎老壁無俗花銀海玉龍
臥豎尾五月笛聲寒不起

過包村故址三十韻

兩浙輶軒續錄

卷四十九

馬廐良

十九

歷歷當年事經過迹已陳孤村曾抗賊廢地更無人百戰悲

橫草千家歎委塵顏垣堆瓦礫壞竈沒荆榛海內狼煙日山

中虎帳辰車徒烏合簡號令白衣申將畧雄龜策軍聲壯鬼

神包立勝稱神助賊亦信之戰輒怯然擒王憑一鼓克敵仗

雙甄膽落跳梁寇歡騰比屋民希安堂處燕免死窟藏魏排

日傳烽急經年接鬪頻星馳周赤縣雲合盡黃巾面面旗遮

浦層層壘逼闐漫云身使臂早報齒亡脣陳潮雲以遊軍爲包村外拔先敗遁

臨陣徒麾扇輸糧莫指囷火聲喧五夜礮色慘三春已分填

溝壑還勞祝聖眞呼庚疋婦哭擗甲餓夫呻巢覆窈完卯池

殃豈縱鱗羣黎迷左道浩劫悵前因撥亂乾坤定承平歲月

新酬勳頒鉅典死難卹微臣誅意狐鳴楚論功鹿倚秦同仇

能唱義報

國總成仁贖屋稽山道荒墳鏡水濱包村臘屋數間骸骨實之充棟因以爲墳千金多故澤萬骨少傳薪幾見棠花發誰憐麥飯湮寒煙淒碧血冷露泣青燐消長機難測興亡擬不倫蒼涼憑弔處落日滿遙津

讀史襍感

弱冠起太原秦王世無敵三十致蕩平太宗無慙色決勝淮陰才料事留侯識文藻相如賦治安賈誼策萬里關邊疆不聞用卜式宮中陰麗華不聞遭廢斥若得伊周輔湯武無不及大度推漢高儒聖祖石勒邱嫂固有怨丁公豈無德帝王事昭彰紛紛猶耳食何況蓬樞士安能審曲直

燕公大手筆聲華冠當世北海長碑頌黃金千里至兩賢豈相戾文字有夙契爲存獨步心遂乏並全勢擾擾塵寰中爭

名不殊利苟非曠朗懷誰能忘猜忌賢者尙如此何況庸庸
輩名士居下僚慎莫矜才智

曲江尙直道立朝好風度受逼李林甫局趣譏雕兔君恩非
不深未得剖心素小人如鬼蜮機械實可懼淒涼海燕吟惜
惻羽扇賦涉世無坦途富貴愈愁苦

楊妃怙君寵所費金帛耳不幸遭世亂首惡千人指驪姬搆
晉難申生可以死不見武惠妃一日殺三子

哥舒半段槍所向皆摧鋒青海與河曲次第銘邊功惜哉潼
關耻令名不克終促戰固非計破敵亦殊庸如何萬貌虎一
旦成沙蟲曹公走赤壁苻堅困慕容逢時苟不利千古無英
雄

鄴侯明哲士處經能達權觀其諫諍語用智如轉圜設令稍

坦率未必終始全苟不乖正道何必直如絃

柳州曠世才昌黎相韻頗牢落居永州讀書多遺忘精力豈
衰老心神恆感傷丈夫不得志意氣何由揚時命既不佑他
鬱徒爾戕彭澤辭手版未必甘糟糠聊以悅心志跂腳傲羲
皇

元相居諫垣氣節頗卓卓反顏事宦寺何乃自菲薄操行本
不堅好名聊振作一朝經挫折英華坐蕭索理遺情未安欲
勝性遂惡讀書志事功貧賤亦何樂賢聖非所希終須慎立
腳

題王孟調

星誠

西鳧殘草

破壁飛難遂摩霄氣自雄老龍吟大澤古鬼泣秋風獨抱長
沙恨誰憐阮籍窮九原魂魄在應自訴青穹

離亂身猶客蒼涼百感秋中原驅鐵騎落日動鄉愁
駢駢同人熱艱難爲

國憂蕭蕭雙鬢影想見賦登樓

晚近論文字斯人不易才生涯艱馬磨死骨冷燕臺已唱家
山破誰扶旅櫬來一斑留管豹三復有餘哀

送文孺謁選京師

人生百年如寄耳安能鬱鬱久居此殘衫破帽辭鄉里斫地
哀歌不能起中原紛紛走蛇豕大江以北斷行李海舶得風
疾於矢垂堂之戒豈若是可憐不及千金子卅角讀書見條
理弱冠便便誦經史文辭一放不得止瀾翻浩翰黃河水有
司目眩無涯涘操觚之家仰微旨詩骨開張世莫比水花繁
粲石齒齒驅策神龍縛蒼兕辟易象園泣山鬼虺蜥欲撼不

得邇砌蟲林鳥空自喜傳之千秋信不訾吁嗟不得博青紫
百里豈足羈駮駟升斗之謀安可已地老天荒命襍被家無
儋石何所恃四壁蕭條不敢視杳杳天心遠莫擬盈虛消息
迭相倚二十拜袞古來幾倒冠落佩類奇士一官況爲
朝廷使簿書錢穀慎莫鄙臣心如水無泥滓循吏功名豈不
倖廬陵相業夷陵始側身江海望知己

岳王歌

朱仙鎮上刀巉巉女直敗馬如崩山金牌未召氣何壯玉斧
雖畫弓思彎韉尖蹴倒將軍旆萬古人心殺秦檜嗚呼秦檜
雖殺功不成趙家天子忌父兄

塵

去住由來未有涯憑誰野馬說南華九邊秋色飛胡騎十丈

春風走計車紙帳暗隨花氣斂疏簾微逗日痕斜灑然我已
心無著不用靈犀護絳紗

哭曹文孺大令

海門極目薊雲寒試盡諸艱身竟拌今春君將由海道入都
有句云身賤諸艱試時

危百報
感增報

國文難爭遷命爲貧天尙吝羸官蓋棺任昉家多累入地劉

費淚不乾太息升沈人世事貢王休更話彈冠君與季桂
爲總角交

卅載殘編苦討尋鬢毛不惜雪霜侵膏肓病久難求艾君十
年前

有嘔血病
至是復作文字功深易嘔心事業未能酬夙願姓名空自重

儒林善人門戶終應大藐爾遺孤望正深

曾學龐公樹下談江城回首柳稔稔聞名慕早交偏晚論古

心歧味轉甘火色鳶肩君不壽炙雞絮酒我何堪汝南死友

今誰是風義平生顧影慙

歲暮寄懷眉叔浦江

冷暑蕭條祇舊瓊堆盤苜蓿若爲歡離情宦況都無奈暮雨
瀟瀟歲欲闌

年年白社逢春日敝帽尋詩醉不歸數日東皋春又到梅花
無恙酒人稀

焦桐篇寄李恣伯

慈銘

焦桐慕素絲明鏡照芳姿之子一相見關山遠別離秋風動
蕭晨早涼生綺閣不恨秋風涼但恨羅袂薄柔肌瑩冰雪美
日耀春星謝彼脂與粉還吾婉變形秦女引鳳吹蜀客求凰
操絲竹雖殊音宮商本同調焚香理瑤徽對鏡掃蛾眉焦桐
有時斲明鏡無時疲

鐵佛歌

并序

剡城東門外有鐵佛邑志稱鑄唐貞觀時背有尉遲敬德監製及男女布施題名字入法端勁類歐虞書舊有鐵佛寺咸豐辛酉燬於燹今則結茅蔽風雨一二比丘司香火焉

洛陽漢帝千年別夢中黃金化白鐵唐皇少別又千年白鐵還遭黃土蝕貞觀鐵佛鄂公造背上隸書點畫好英雄老去抱佛腳懺悔少年殺人飽劫火兀兀燒剡溪舍利不出佛浴泥十年募化得茅屋屋前膜拜窮僧尼世尊緣法今非古萬里西天斷香火近西城皆奉天主教無奉佛者諸佛骨塏盡受苦頑鐵區區何足數

馬秉南

字彥臨號運青廬良從弟會稽詩生著水南堂詩二卷

孫德祖曰小舉部馬氏世業釀自鷗堂崛起以詩古文詞名于時羣從化之彥昭尤秀拔坐飢馭未致通顯霜凋夏綠致可傷也所著有駢體文二卷疏籟詞三卷藏于家

剡谿

越東山水稱剡谿千巖倒映青玻璃清風之嶺尤奇絕亂皴劈斧如層梯前崖高仰後厂伏古樹森森結寒綠欲從洞口覓桃花卻向山頭見茆屋重巒疊嶂無人蹤耳根恍惚聞疏鐘鐘聲冉冉白雲靜都是青蓮夢中境青蓮夢到身未來我今身到空徘徊安得詩魂度湖月攜手同上金銀臺

邪谿

泂泂新水欲平隄綠暗紅稀鷺亂唳記取今年三月半畫船三過若邪谿

述懷四首

錄一

也曾橐筆走西川再泛珠江渡口船萬里歸來仍故我一衿
青後已中年空裁潘岳閒居賦難得君平賣卜錢擬向清貧
尋樂境還須搔首問青天

卽事

九月時光一剎那風風雨雨暗消磨明湖不放尋秋艇辜負
青山紅樹多

黃方慶

初名灝字穀臣黃巖廩生

王舟瑤傳略穀臣幼工韻語喜填詞弱冠後致力三史遂不復作賦性嚴正不苟言笑人有過失面折不少忍人多憚之有問學者則究源竟委娓娓以告惜不永年未竟其學著有測圓海鏡術解七卷句股邊角相求術解二卷算問二卷火器新術一卷

雲石寺雨後

水漲池塘碧草肥檐閒燕雀弄晴暉江頭樹色連山寺簾外

春寒上客衣斜日橫從鴉背落亂雲爭向隴頭飛無人相識
還相訪陌上微吟緩緩歸

王維翰

字嘯林黃巖諸生第

陳鍾英序略嘯林三萬卷樓草纏絲腕側一往情深往

往顯陶謝之映而入王孟之室其感懷時事奇氣往來

又于少陵太白爲近雖不拘拘規極前人而性情

豁露真意洋溢自得風雅之遺可謂今之詩人矣

王詠覽序略嘯林詩冲淡自然世之學陶者能辨之其

中感事懷人纏綿悲壯之作于陶尤近嘗錄其避兵柵

頭之什爲豁上草重悲邑里之殘破友朋

之寥落一發之于詩不自知其厚之旨以寫其纏綿悱

陳一鶴序略嘯林詩本溫柔敦厚之旨以寫其纏綿悱

測之思迴非祗唐祖宋者所能藉口又留意撰述所輯

委羽山志辛酉殉難錄台山
梵響鄉邦掌故皆卓手可傳
何炳麟序略其氣渾灑其法謹嚴其意蘊含其
詞簡古是沈酣于漢魏六朝三唐而得其神者
緝雅堂詩話余編輯軒輿錄應君寶時胡君鳳丹宋金
華丁君兆慶吳君鍾奇采湖州君采台州財二十瞬部
爲異物成書將鐫幽室已閉亟訪五君遺詩爲之登錄
曾謂此集乃有姓氏吾黨英彥亮均太息沈吟斷響愀

然于懷君所著兼有
駢文賦鈔各一卷

述懷

蜉蝣有朝暮螻蛄無春秋人生一百年歲月何悠悠與波日
上下汎若水中鷗旨哉人閒世酌酒銷煩憂

塞翁悲失馬鄭人夢得鹿得失本無常此理寓剝復造物有
深意胡不思之熟福與禍爲鄰禍兮福所伏

螳螂毋當車蚍蜉莫撼樹世人不量力動輒井蛙怒欲以葆
吾身曷不安吾素咄哉冥冥鴻竟令弋人慕

拉虎摧其斑揜熊碎其掌古人重有爲意氣何骯髒愧我守
柔翰馬齒日以長欲得赤水珠願言求象罔

獨居

獨居苦岑寂薄暮枕書眠忽動水仙操長吟山鬼篇溼柴愁

爨火破屋鼃炊煙一飯王孫重淮陰感少年

雁山雜詠

行行謝公嶺偃僂瞻髣髴不知老瞿曇何年可成佛

老僧巖

龍鍾一老叟側首狀如塑自無李長吉驚天乏奇句

聽詩叟

造物弄狡獪欲弭東南缺屹然數千丈孤峯撐日月

天柱峯

壁立何岌巍千尋俛碧霄長嘯望鸞鶴舉手雲中招

碧霄洞

讀晉書隱逸傳

奎衡寄遐緬魏晉幾潛淪保耀圖薪火知交有炭人撫琴神

以導讀易道斯溘大笑出門去全年自識真

孫登

獨抱秦遺籍茫茫五百年刑名正治世道義辨真詮天下污

隆際人閒同異篇月星按暑度著論準周天

魯勝

禮典日文飾公卿將奈何洛城東北路胡象兆蒼鵝無化陳

留論升堂太學歌知幾方入蜀嘯詠老巖阿

董養

無用當車諫山居已積年門徒資講學太學獨稱賢遐景邈

燕國長謠竟豆田諸生方痛哭埋殯草芊芊

霍原

天下方兵亂空山合杜門道惟貧可免官豈貴能尊人事重

遺禮吾生老灌園黃金隨手盡清軌幾人存

范騰

道化味無味元居當世欽塵中方插腳天外忽棲心百尺梧

桐榦九州鸞鳳音黔婁比高遠天地付孤吟

索襲

廬墓三年後臨松鑿石居潛光憶薤谷絕迹謝蒲車遊鹿悲

庭際翔鴻渺太虛至今赤崖閣飲氣有誰如

郭瑀

重鑄岳墓姦倅

鋤姦千古氣凜烈嶺上桃花眼中血海枯石爛會有時頑鐵
之名永不滅我聞黑風吹海作鯨立儀徵阮公挺戈入歸來

銷盡不祥金鶴鶴夜叫老蛟泣洪爐煅煉光熊熊良冶鑄出
凶人凶草閒魑魅遁不得年年故鬼號秋風鼓鼙動地寒雲
漫銅駝荆棘蒼茫嘆三像隕首一像仆豈真賊亦憤宋姦方
今寰海已底定重銷鋒鑄姦佞鐵乎鐵乎爾何辜何不鑄
作趙忠毅公如意擊東廠何不鑄作錢武肅王誓券申廟謨
不然鑄爲農器利農夫胡復遺臭污西湖君不見狗葬有村
傳葬狗埋豨未必果繆醜夜深黑氣萬丈長骨朽須知鐵不
朽

新題九峯歌詞 錄四

天馬從西來精神特凜雪嶽崙踞吟鞍一峯互凹凸馬尾飛
懸流千條東向折今古幾英雄掉鞅意決烈弗學瘦馬吟飢
驅哀跛蹙春來山花紅一鞭濺汗血

天馬峯

紫霄飄瑞煙磅礴出雲表去天咫尺耳仰首近蒼昊一培塿

頽雲俯視眾山小晴霞明蘿磴夕陽隔林杪詩句驚人無間

天異謝朓會當登日觀振策扶桑曉紫雲峯

朱鳥臨南方七宿先天井天闕位其南象緯俱引領我歌杜

陵詩煙嵐妙寫影依斗望京華此心獨耿耿高挹太微垣丹

霞夕彪炳無為慕冲舉結廬在人境天闕峯

志士羨青雲於此得棲息林巒講席開書堂近咫尺晨夕此

引領振衣慮偪仄摩崖鸞鳳翥碧落留篆刻豈不企高蹤所

重在道德寄言大雅儔致躬各努力青雲峯

王氏五君詠

束髮磻經王引之宏開橫舍樹人師泔泔大集鏤冰雪如讀

鍾山蔣廟碑子莊

握槩懷鉛老一瓊東山高臥自年年人閒烟火從來薄多少

虛皇侍從仙

桐鄉翰屏

湛深經術汪容甫角逐詞壇杭大宗秋水半江人不見圖成

三十二芙蓉

六潭詠霓

經始萌芽詩始葩乾坤清氣露英華高談妙絕東西晉讀盡

奇書四十車

吉人士駿

矮屋秋燈夜課詩展圖一慟淚絲絲選樓點竄驚才豔不似

熙豐以後時

葵臣禹堂

讀張芸叟畫墁集

浮休居士漫歸休萬里西征事遠遊白骨似沙沙似雪關山

滿目異鄉秋

百卷遺文次第編又聞雕本出臨川當年詩禁元嘉密搔首

南浙輶軒續錄

卷四十九

王維翰

天

川文

關河意惘然

回首長安復東夕陽都爲別離紅往來元氣豪無敵誤入東坡別集中

折柳臨川倏幾年鬢鬢誰復髮蕭然倦遊有客南還急一路燕山嘯杜鵑

山程水驛錄從頭絕景應推英武洲鐵笛一聲豪興劇頭陀寺枕大江流

懷人

身世艱難感雄吟扣寶鐔卅年困兵甲頗頹大江南未泯蕭梁選亦宗黃老談日華照孤影何處問江潭

武校譚仲修大令

憶其孤山住梅花吟冷魂鄧林倚高嶽康樂重賢昆漢學源流永經師家法存未堪對嵇阮獨坐默無言

危海黃元同孝廉

任席珍

字梨腴號小坪兩坪子永嘉增貢著棋筆樓吟藁

方鼎鏡序畧梨腴幼失怙恃寸齡輒工詩嘗語人曰先人遺殘帙數百卷饋貧糧也生平曠齋懃行事不苟性利易尤嚴於取舍其潛心經史酷嗜吟詠大有父風

早梅

春卉謝東皇秋芳殘老圃一年惜花心風風復雨雨對此小陽春憶花花未暗報我南枝開有客來大庾色占百花先香撲一枝古肥未得雪添潔已與月伍我情爲之移魂夢落林隴美人是耶非處士仰而俯初訝霜華凝繼疑珠璣吐旋駭羯鼓催終喜縞袂舞復見天心初暖徵地氣聚索笑不須多尋春已得主相對作高歌清氣滿寰宇

徐學誠

字菴生晚號惕叟永嘉諸生

遜學齋文鈔老友菴生謹約好讀書善琴精醫予嘗就求鄉先生遺書菴生爲致項參政集張虎文謝世齋詩

其指趣非郡人所知也

撫琴圖四言六章

我撫琴兮于泚之軒

予所居卽先賢周博士泚書院遺址舊有泚軒

焚香坐對聊

避塵喧

我撫琴兮于泚之室

舊有泚室

蘭秀菊芳春秋佳日

我撫琴兮于泚之閣

舊有泚閣

明月清風時入我幕

我撫琴兮于泚之樓

泚之東于新築挹爽樓

山青水綠或峙或流

樓對松臺

雁

我撫我琴有懷我師

弱冠後學琴於馬蔚霞夫子

哲人其逝我心傷悲

我撫我琴爰養我年古調自愛以樂我天

素心蘭和怡園曾氏叔姪

漫吟紉佩續騷篇雅操還應譜素絃虛室夜涼香冉冉空山

秋老露涓涓誰將芳澤供青女好並寒泉薦水仙珍重幽姿
須護惜庭階佳氣鬱芊緜

玉立珊珊骨亦香嫣然素質壓羣芳豈宜塵世繁華眼只合
詩人冰雪腸露白無聲滋九畹月明有夢到三湘竹林勝事
何多讓滿室清風止吉祥

詠林霽山

紅羊劫火遍江東痛恨諸陵草莽中白石一編留正氣青山
千古泣孤忠箋詩幸有章和父同志惟知鄭樸翁每向昆陽
仰芳躅雲飛渡口想高風

詠鄭初心

世亂馳驅古越中文章報國已成空珠襦玉匣悲先帝野棘
荒榛望故宮辨禮早知存正義著書原不墜宗風薊山歸隱

人何處恨少豐碑爲表忠

游雁蕩山

坤靈闕神壤晚出得奇曠温台山海中詭譎呈殊狀嶂疊谷
迴環瀑飛雲蕩漾雕鐫乘險絕經營惟鬼匠峯泉洞壑攢百
變爭新樣祇許巨靈開未容謝客訪桂林武夷山岷曲無多
讓杖策追高峯飛雁落湖上

夏日與馬蘭生

元熙

暨三兒松如同遊孤嶼率成古詩

攜琴來古剎飄然絕塵俗一葉渡中川清且方初旭山原曠
盈視川澤盱駭矚風乎大樹下滿日生眾綠所至皆自得萬
緣不我束釋氏重明心仙家貴絕慾名教有樂地守分遠恥
辱囊琴詠而歸暢游欣亦足

項

瓚字禮瑳號芝石瑞安瓚生箬集雲山館詩一卷

林用光曰芝石九歲能吟詠觀亭居士奇之贈以詩云
之子後來秀新詩自在吟靈駒千里志雛鳳九霄音筆
底花初吐塘邊草自深爲
憐才調好到處說難禁
朱壽保曰禮堪爲雁湖子幼承家學喜吟詠尤工
詩孫琴西大僕爲之序所著兼有癸辛詞二卷

雉子班

隴麥何參差雉子雖平綠青鞵何陸離丹臆信文縲求侶飛
故遲得食聲更促失足網羅牽不復翳林麓飲啄來禍機令
人羨黃鵠翱翔霄漢閒永謝樊籠束

山齋秋夕

高山銜夕陽閒步無人境冉冉爨煙飛暮雲低覆嶺茅齋少
塵思祇覺漏初永蟲語石泉寒螢流蘿徑靜梧風送疎聲松
月漏清影暫緩理殘編題詩記幽景

早起

虛室悄猶靜林泉發興清樹留殘月影風送遠鐘聲竹露垂
簪幘藤花落石枰蕭閒池館裏趺坐聽嘒鶯

仙巖山行

常懷泉石勝策杖上嶙峋瀑噴龍垂澗巖奇獸攫人秋聲連
北嶺暮色滿南閩獨羨煙霞客蕭閒猿鳥鄰

陳

誥字笛舟
樂清人

玉虹洞

危峯矗立洞天開遙望渾疑白玉臺九曲徑隨山勢轉千巖
風送水聲來仙壇晝靜眠元鶴藥鼎春深長綠苔縹緲鐘聲
雲外度此身恍似入蓬萊

暮春有感

春光忽已暮風雨奈愁何詩味濃於酒人情薄似羅劇憐知

已少生怕受恩多
遙想淮陰事
凭欄一嘯歌

雨中聞笛

風雨颯然至
山齋欲二更
一聲何處笛
吹起故園情
有客正愁絕
蕭然對短檠
江干好楊柳
搖落感平生

偶吟

麈尾憑誰問
六朝柴門長掩自
蕭騷種花有致
招飛蝶沽酒
無錢典傲貂
一角山昏知欲雨
半江風急覺來潮
多愁自是無情思
且讀南華散寂寥

諸可斫

初名可與字起齋號又隱巖子錢塘人同治甲戌進士官翰林院編修

秋荷

偷得湘皋一縷魂
淩波靚影正當門
斜陽獨立嬌無語
涼雨初收澹有痕
柳曳殘黃依水驛
蘆分淺白對江邨
秋懷悵觸

知多少一樣風光可共論

龔姚十一同年

禮泰

紅蘭詞最妙佳話說登科

尊丈有紅蘭詞記君入翰林事

傳世藏書富尋春

被酒醅學傅昂英正文校牧庵謫才藝真無敵期君挽逝波

王汝霖

字叔雨號少梅錢塘人同治甲戌進士官江西弋陽知縣

王麟書曰少梅嘗作書論東南兵事二千餘言後五年皆驗杭再困于寇少梅走城樓謁王壯愍請築甬道十里通饒饒堅守待援議七日不決而江岸遂爲寇濠達絕城陷開關走避得全甲戌成進士籤分江西權崇仁善擊斷賊健吏以獲鄰盜功補弋陽未之任而卒

詠蚶效韓孟聯句體

海濱斥鹵鄉蚶田足供給响响畝盈千纍纍利獲十揚灰地力肥園泥杵聲急煙雨長瓊瑰潮汐護玉粒踏波折腰撈披草徒跣拾筠筐藉菁茅苾屨走城邑啟羈醜醜香敵筵冠帶

集清泉竹帚淘沸湯瓦注入挑剔一隙開顛撲兩楞翁碎擘
丹霞肌亂滴朱露汁椒韭偕調和蝗蜺同厭浥勿其珉桂烹
當並蟹螯執酒沃絳雪張羹芼紅霞熠仰覆壘礪礪縱橫堆
業岌微腥舌本回餘甘齒頭吸雋味樂清腴野人愁梗詭飲
血心神怡和藥肝氣戢蛤蚧種本殊蟛蜞誤莫襲願攜海國
圖爲證蘭臺笈吟情續老餐琳琅授佳什

王麟書

字松溪錢塘人同治甲戌進士

丁丙曰松溪性偶儻工詩賦爲浙派的乳厯官廣粵廬
陵萬安循聲卓著宦游十六年飄然解組歸三輯之刻
松溪以校讐自任僅及
八卷而君已病歿悲夫

陸先生哀辭

并序

先生諱璫字雲九錢塘諸生

麟書

少日授經師也博

學多聞辭翰英妙久不得志遂隱於酒老依德州牧

徐君以終先生謝世垂二十年後來學人幾無知者

敬述此詩

錢塘三陸

鯤庭先生培殉明難講山先生圻遺老世傳仙世去梯霞先生堦亦遺老當時謂之錢塘三陸

所傳行人殉國醫者仙尙書

鳧川先生宗楷

中允

恂齋先生嘉嶺

各鼎貴聲

華寥寂今百年先生博聞古之賢六經三史腹便便雲閒自

與日下敵李邵輒占劉蕡先中年奮身入酒國醉筆妙入秋

毫顛澆胸塊儼輒隱侍側螟蛉皆萋萋弟子鍾張早入室

張少南明經道鍾雨辰修撰駁聲

異軍特起相聯翩是時麟也甫弱冠執經

問字情逸絲醉中曠目忽太息非世所好子胡然暮年橐筆

走齊魯諸侯上客相招延德州使君好問故往往剖析如流

泉嗚呼無家更安往故鄉回首生烽煙白雞夜夢呼起寓

公埋骨荒城邊

先生墓在德州西門外

生平著述嬾收拾吳江楓落燕

完篇寢門一慟今廿載長歌欲託里乘編

張公東大令校經圖

并序

校經圖公東張子爲感舊作也同治初元浙江初啟書局設總校者四分校者八時制府馬端敏公方來撫浙領局事者太守薛慰農先生鄉先達孫琴西先生也公東與余實與分校會

廷試期迫公東不久于是故自記於後來諸君子率未之及前塵邈然歲幾二十校經十二人中惟余與公東同游江西者七年其閒同輯省志者二年余近益衰老行賦遂初公東出圖屬題友朋聚散之迹師弟存歿之感寫以長歌後有覽者足徵鄉邦一故事也

兩江制府按羣材市駿欲比黃金臺

曾文正公旣定東南乃設書局于江甯日夕言

論拔其尤致之幕府是爲聞風興起首兩浙中心之好同端

同治初各省書局之始聞風興起首兩浙中心之好同端誨尺素而求通者吾弗之從矣全椒瑞安翼厥事龍門

之高高崔嵬殷勤蒐訪徧吳越木難火齊英瓊瑰提鉛握槩

各自異就中吹竽余非才高公老成重碩望義不受粟羣所

推高先生伯平余與仲景星慶雲吾豈敢諸子要自稱雄魁

星慶雲之目宜思所以副之推襟送抱致相得譚經說藝求

其賅絜靜精微易之教惟吾公束無纖埃精研六書許氏學

欲與鉉錯相追陪人生聚散不自主坐令千里思岑落寢門

之痛已非一高辭兩先生遺編三復心神哀李予長安閉戶

久聲譽益噪如春雷李蕪客戶文昌故以樂府著精神發慮

新登槐張子虞皖中閩中鬪兩劍譚仲修大令幸台肥張獨

驚淡水同偏蘊梅嘗權淡水爲人齷齪石頭城郭漢陽樹

好風更送循聲來

陸春江陳藍洲雨大令同年

鴛鴦湖頭沈腰瘦書成每

換籠鷺回

沈波民明經

廣文官冷餘二老昔年馳騁真龍媒

汪維雅胡

嘯眉雨廣文

章江再聚獨吾子前塵回首同徘徊風雲變態世無

極未知誰氏傳埏垓詩成擲筆我將去不辭仲蔚居蒿萊

歲暮懷人四首

越縵才華錦不如紅塵十丈閉門居諸公袞袞登臺省口吃

揚雄自著書

李苑容

施子酒酣耳熱時茫茫四顧欲何之往年仗劍入秦隴有約

歲寒傾一卮

施均補

少歲才名傾萬里纔過四十鬢如霜皖中離我一千里鐵廚

鞭絲聽擅場

譚仲修

陳侯少我近十歲上下古今無不論離別長安一杯酒寄書

遠道動干言

陳藍洲

高橋發程抵南昌

紅樹青林出雨餘
西山秋色竟何如
江光上映浮孤塔
嶺勢中分出小車
今歲好爲遊客記
此來要讀活民書
故鄉亦有湖山美
何日秦亭許結廬

初夏廣豐道中

山花自開落
谿禽獨來往
木葉朝露滋
草根伏泉響
高田喜雨多
一霽萬綠長
誰云簿領勞
敢作豐年想

甲戌初夏僑寓宣南南皮張疇生命駕過訪迹其生平
悒悒寡懽蓋獨行君子也其詩有忠摯之思不以草莽
自棄翬乎小雅之遺音焉爲賦一百四十字

弱草懷木心
枯木蘊奇節
君子抱隱憂
炎暑畏冰雪
悲歌復

慷慨燕趙多奇傑游魴不觸綸寒蟬獨抱潔寂寥五十霜迴
腸日苑結天親多凋喪良偶亦永訣念此平生事萬古兩決
絕胸抱萬斛愁眼鑄一寸鐵綢繆恐陰雨時時肝腸熱嫠婦
不恤緯草莽多切切放筆爲詩歌所工離言說鴛鳩槍枋榆
夷然故不屑長安一相見晷短易爲別此意各珍重勿笑異
車轍

答李芋仙刺史

士蔡

忠州才望重儒林苦困鹽車驥足駸垂老未除名士氣率真
猶見古人心韓陵片石今誰屬芋仙寄詩多道公東祇樹雙
株昔共尋去年同游南昌郭且自開尊傾臘酒莫將遲暮惜

光陰

陳伯潛侍郎

寶珠

試士南昌日方午無雲而震旣而知

雷擊鹽法道廨老梧
梧中有狐竄往山廟
雷逐而去
侍郎謂梧材中琴乃賦
霹靂梧詩邀余同作

傳雷走妖狐冥默涵至理一驚而百伸
良材以之起高樹抱貞心百年忍半死
挺挺劫之餘良匠爲色喜配以冰絲絃清
聲自茲始遇合苟不逢摧敗辱泥滓所以
菁莪詩中心喜君子

夏子松侍郎 同善 輓辭

今古純臣選常餘墮淚碑

三朝承

寵遇一己絕瑕疵樸素生平守聲華
早歲馳不言溫室樹長託上林枝
焚草機何密批鱗世莫知

大婚臣贊禮

穆宗皇帝大婚公與夫人並襄吉禮

毓慶

帝稱師蕩節前時出觚稜此永辭評文衡莫爽察士鏡無私
冀北良方選江南曲可悲門扁星使瘁梁壤哲人萎清淚孤
寒灑

隆恩典禮施長安十年別一慟盡交期公與余同出趙文恪

治甲戌余出長安未與達
官貴人通書遂絕音問

左文襄公哀辭

大星流不起涕淚滿山川忠擊惟

天鑿聲名到死全積讒金不毀主戰鐵同堅想像臨終事防
邊託後賢

少歲參戎幕長籌禦寇氛功超百戰上名達

九重聞蠖蟻旋空穴熊羆獨領軍至今淞水上婦孺識高勛

冲齡席九重秉鉞仗元戎相國三台貴諸侯五等崇花門還
舊月蔥嶺接英風海國無違語中朝第一功

弱肉安南土驕人閩海師萬夫同義憤一老獨支持策敵能
無懼和戎豈所思他年青史筆燕許好爲之

陳光熙

字學黠號叔原以昌季子蕭山人同治甲戌進士福建候補道

孫德祖曰君少多病性靜穆日惟手一編自謂如飲食之不可一日無也伯兄伯蘊精八法君與相師友尤擅小楷以庶常改授思恩令引疾未赴援例遷秩監司需次閩中葬親歸遘疾而卒於近代詩喜梅村偶有所綴頗似之

清遠早發

侵曉發清遠推篷尙見星樹搖半江綠山壓一城青盡室成
流寓輕裝又客船昨宵鄉思急夢過學詩庭

遊仙詩

三疊琴心道已成瓊漿一勺見雲英偶然乞與遊仙枕兩度
崎嶇上玉京

赫蹏小字寫黃庭更染麟毫記洞冥別有長生真訣在畢烏
房兔總無靈

徑寸明珠飾佩璫羽衣親見舞錢塘風鬢霧鬢無顏色謫向
人閒去牧羊

爐火光青證九還枕中瓊祕悟元關錫鑿雞犬都仙去莫問
淮南大小山

安期巨棗大如瓜曾致仙人貫月槎見說蓬萊水清淺天風
吹散玉塵沙

一舸凌風指日邊紫泥海外隔雲泉便教折得瓊枝去不戴
金莖未是仙

手執芙蓉別帝鄉，藥珠舊侶餞霞觴。
分明天半雙鳧影，履憲猶應識上方。

自築崇壇禮玉京，便從丹竈得傳薪。
上池未敢偷靈藥，瞬息流珠已去人。

吳山懷古

錢江匹練奔且呼，烏喙已後遺恨無。
卻怨明湖屬西子，偏傍青山對伍胥。
句吳疆域論千里，此山猶幸在吳地。
一舸鴟夷逐浪回，岩巖依舊人非矣。
漢魏六朝世變多，山靈有知喚奈何。
秦皇鞭石不入越，始信靈胥靈不磨。
潮聲夜起風怒號，神幢陡上高山高。
此中保障非人力，漫說錢王犀弩豪。
南朝王氣金陵薄，臨安山水猶寂寞。
吳娘踏浪賽秋濤，一上翠微作行樂。
自從香吏蓬萊下，獨占形勝稱詩霸。
望海樓高燈火明。

修篁嶺亦煙雲借陌上花開春復秋英雄兒女付東流白猿
羽客洞何在黃鶴丁仙閣自留州城迤邐遠相屬南渡偏安
山一曲立馬危峯事縱虛小朝廷已成殘局丹青圖畫落塵
寰洞天福地相迴環古來多少興亡蹟留與行人說好山吁
嗟乎夫差當日志吞越磨劍霍霍石爲缺君不見錢唐江上
素車白馬鼓濤者不撼吳山撼越赭

章德藻

字端甫一字遵瓊金華人同治甲戌進士官兵部主事

余烈撰墓志君甫執塾卽卒業七經以能文稱且工吟詠通籍官駕部諸僚所疑難未發者君一二言輒中款要旋以省親卒於閩庚辛之難君負母行數千里間道達閩年未寇也人尤多其孝云

楓鎮候潮

江南黃葉落歸路借輕槎鳥宿雲低樹潮生浪拍沙客心流
水急鄉夢亂山遮燈火前村裏移舟問酒家

夏曾傳

字翁狀號薪卿鳳翔子錢塘人江蘇候補通判著在茲堂詩

吳慶坻曰薪卿濡染家學少卽工詩長隨子儀司馬入秦又遷晉陽車塵馬足中吟諷不輟南北試不得意遂仕吳門方心淡面弗諧俗好益頽然自放於酒偶還里門入織華吟社未幾歿于吳中所著尚有駢文水經注指掌音學緒餘文選類牋諸書

商州雜詩

我行商於野馬首日復東商山當我前瞥眼青濛濛繫馬道
旁樹間訊當壚翁欲尋采芝客云在青山中入領煙霞趣出
效羽翼功事成忽棄去矯矯人中龍仰止何當慰空復懷高
風不見山中人但見山上松鬱鬱青四時安問窮與通
商山連太乙萬仞何青蒼東接武關道窄徑開羊腸張儀逞
舌辨蔑視諸侯王楚人自貪利國蹙胡足傷所異隆準公一
旅來咸陽三戶一張楚乃借疆秦亡固知成敗閒不藉形勢

强安得六百里終古爲秦疆乘時方在德翹首威弧張

陳生行

并序

生名鎮海仁和武生傭於錢塘張仲甫氏庚申二月
城陷攜一刀一矛出殺賊四五人賊虜至執而投之
火仲甫先生作傳紀之徧徵詩歌輒爲賦此

城頭颯沓風怒號黃雲壓壘天爲搖驚聞賊騎破關入軍門
猛士紛騰逃陳生奮臂倡大義結束短褐持寶刀翻身卻入
虎狼隊譬如猛獸恣咆哮爪牙所剜豈能活橫飛兩血風吹
毛一朝力盡委妖醜國殤殺魄干雲霄邇來事隔一年久主
人念爾心煩勞西江郵書寄東海遍徵同志爲掬毫方今六
合盡泥滓當途不辨鸞與梟安得持章告

天子盡使爾輩持旌旄忽如狂風掃秋籜坐令四海無征徭

古來烈士重然諾死生成敗隨所遭況如陳生死國難荆軻
聶政皆爾曹長歌聊激壯士肝天邊魑魅休相嘲

長安道

長安道離離月出舒清皓漢寢唐陵久寂寥終南太華空迴
抱長安鬱鬱古皇都萬戶豪華天下無八水朝河關天險三
山拱嶽奠黃圖曲江蒲柳宜春苑年年修禊停珠幃河曲金
人捧劍游霸城銅狄淩煙晚憶昔西京勝會多百靈擁蹕渡
黃河桂舟蘭楫游汾曲簫鼓微吟發棹歌蜚廉桂觀憑空起
承露金盤去天咫甲帳虛傳王母游馬肝已誤文成死方士
無由覓藥方馬門冷月助淒涼哀蟬落葉成回首飛燕輕盈
出建章趙家姊妹顏無比金屋妝成猶未喜燕啄皇孫不敢
驚未央宮裏嬌羅綺地轉天旋不可常鶯花鄂杜忽荒涼銀

屏珠箔驪山上繡嶺花開滿路香驚鴻妙舞霓裳曲宮女梁
州歌續續朝元閣裏試溫泉合歡堂上徵蛾綠昨進黃衫舞
馬牀今來南海荔支筐一朝征戍紛南北鸚鵡無言問上皇
桑條歌罷穠桃暮韋杜風光天尺五寂寞樓東一斛珠月明
南內歌重譜漢陂風漾琉璃青夾城仙仗動雷霆望仙樓上
君王香鈿盒金釵空涕零麒麟股折青梧觀世代興亡幾回
見君看露冷通天臺可憐月落明珠殿御氣盤空今尙疑黃
山紫閣望邈迤含情獨賦長安道萬里風煙有所思

鹽池行

我聞萇宏之血化爲碧黃猿悲嗥杜鵑泣又聞蚩尤之血化
爲鹵積雪飛霜亙千古逸書悠謬多謫傳百二十里成淳淵
天生地寶供民食阜財解慍神功宣石琴三尺委塵壤風宰

秀髯調薰絃風沙神池絕天起

池神卽風沙氏

離海銀光入樓祀仙

靈奇字幻蛇龍

廟有地接天寶額相傳韓湘子題又東海栽玉樹西池生金霞一聯則純陽子筆也

太

陰鬼精出地底古來神物多靈符災祥詭異良不虛虎踞廟

廷龍躍水

虎踞池神廟及龍出鹽池皆前明時事

鹽花倏忽紅如荼

前明時池忽產紅鹽

穆王八駿去不返金霞玉樹光有無景山南望鹽販澤山經

釋地言非誣或云河源或海眼蒲昌東下皆同趨吁嗟乎水

流終古有通塞灌漑於今仗人力海底癡龍喚不醒千畦望

斷雲根黑

月夜泊東昌

皎皎家鄉月隨人作遠行今宵春欲盡和夢度聊城明日扁

舟去歸心一夕生綠雲樓下水浩蕩向南征

河東懷古六首

風后祠

五絃彈不盡蕭瑟女鹽池酒島橫雲矗蒲釐出水遲負書陰
浦夕吹垢海隅時彷彿軒皇夢青山風后祠

蚩尤城

十丈妖星滅蚩尤尙有城鄒屠天縹緲龍魁怒縱橫炎帝無
遺澤中原遂苦兵未須尋瑪瑙鹵地舊封鯨

關龍逢冢

寂寞雙龍駕蒼茫大禹功貢金輕九鼎俘玉兆三腹征伐初
移運艱難首效忠幾人誇俊物馬鬣閣蒿蓬

巫咸谷

採藥歸何處瑤臺似玉門十巫疑夕降孤岫欲朝昏水入無
鹽急雲連柏母渾椒糈要不得誰與叫天聞

傅巖

舊時胥靡役巖谷尙嶙峋
版築身將老鹽梅契獨真
夢中調鼎鼎天上見星辰
回首巫咸谷荒山許結鄰

虞阪

險絕巔幹阪危峯勢攢拳
雲分橫嶺碧天入薄山
斜世豈無騏驥名徒惜齒牙
最憐逢伯樂依舊困鹽車

樊城贈吳子荃子修

鹿門山色壓篷青
沔水依依我舊經
十載旅魂迷越嶠
兩家歸計託吳舫
荒涼廢驛憐芳草
汗漫前游感落萍
辛酉入秦曾借玉同
伯昆季此去水鄉鰕菜好
紅絲待繫酒雙瓶

丁

午原名正字願生又字奚生錢塘諸生

俞樾曰奚生家藏書爲大江南北最篤學嗜古有子勝斐然之志余方謂天假之年必有大成孰意秀而不實

顏氏子同慨也其從兄松生明經出示遺書有重文二
卷如从字棘字之類博考諸書求其音義此雖小學之
一端然其用力固已勤矣余因勸松生付諸劊
剛以廣其傳使學者藉此以窺古人制字之原
馮一梅曰奚生學有師承著述甚富嘗作購求
文瀾閣遺書議一篇當事者采其議惜其人已歿不及

見矣

孫禮煜曰奚生丈與煜同受業榜闈揚先生之門丈先
煜請益者七八年親炙既久其用力沈勤故其說經之
作皆獨出心裁蓋學漢而不流艱滯學宋而不入空疏者

冒雨訪盛鳳翔城北寓居留飲春盤醉後有作

入春雨雪多兼旬風簌簌枯坐兀無聊蠟屐訪城北登堂一
笑迎握手意可掬天寒泥留飲是真來不速嗟我生寡歡性
僻難諧俗與君久締交淡然若蘭菊遇合彼此同牖下猶雌
伏瞻顧名利場無能共角逐笑彼冠蓋多其奈知食肉不如
咬菜根靜對縹緗馥優游寢饋中萬卷丹黃讀

君頗蓄書其
皮閣曰萬卷

知足神自怡朱顏爲君祝至樂頗耐尋何必求多福衝寒梅

上川士

信芳同上孤山麓

曾有探梅之約故云

元大德年文廟編鐘歌

金鐘澤古洗蒼翠雅樂鏗鏗聲未墜鑄造年稽大德朝學宮

路記杭州地杭州禾黍宋臨安鐘簾斜陽感淪替紅兜毒築

窳堵波太學石經隨地砌如何繼世崇儒先典禮煌煌廟學

紀廟學典禮六卷載元甲辰始增國子生通考大德八年冬

色目漢人三文宣廟成越翼歲元史成宗本紀大德十年秋八月文宣王廟成行釋奠禮

江浙行省奉指揮博訪宮懸追古制舊工尙有得仲施通考

九年命江浙行省製造宣聖廟樂器以樂律居然此身繫六

宋舊樂工施得仲審較應律運至京師

金一錫付洪鑪堯氏工良舊呈藝三十六乳垂勻勻兩弓相

背範文細爲鈇爲於爲鼓鈺審較尤精考工記一鐘一律奏

各諧凝安曲合音無戾雍容禮樂追虞廷從此休明始大備

嘉興路學至元鐘尊簋鑑瓶萃十四嘉興府儒學有元代祭器十四種見兩浙金石志

然散步尋蕭寺梵鐘一杵易啞羊大德金書剔款識總管教

授暨工名太簇雙文別其器抱歸仍在古杭州鐘兮應滴銅

仙淚昔歲松生仲兄游吳門於廢庵中見大德年編鐘一口隨以大鐘銅易之而歸一面分四行鑄大德乙巳平江路總管榮兒赤教授劉惟肖造十八字一面分二行鑄足與

杭州路儒學樂師施得仲十字兩面均鑄太簇二字

龔宮至正碑元至正十五年杭州路重建廟學輝映前朝紀

文瑞烏龍舊有西天鐘蘇綠蝕殘蒙古寺萬松嶺烏龍社廟中舊有元西天元

劫後已失所矣今竭來寇至化劫塵空想奇聲付松吹護持佛

力誠區區何似儒宗傳萬世大叩大鳴發正音詎止流傳金

石契

題重摹龍泓貝葉經歌詩卷後用龔衡圃詩韻

四十三番幸尙傳珠聯二萬字纍然秋凋一片梧桐葉香染
千花蒼蘊禪北宋進呈猶可證西僧翻譯豈難詮何時靈跡
留靈隱寶鎮山門不計年

敬叟吾宗墨妙傳惜哉已付劫灰然稿經七易煙雲幻綠續
三生文字禪如見虎賁親肖貌好留龍藏證靈詮庚辰甲子
重周歷一刹那驚百廿年

歲朝三日曉起坐九峯居兼懷修甫姪

曉起憑闌乍霽天林容如沐尙含煙椒花獻歲新更律梅萼
衝寒故鬪妍檻外幽禽同客懶座中癭石似雲眠閒關頗憶
長安旅願爾天衢快著鞭

查

潏初名應驕字仲篋號筱硯
海甯人江蘇補用知縣

家傳略君幼穎悟比長綜覽羣書惟日不足好爲詩古
文詞弱冠遭亂避地崇川同治紀元李傅相方規復蘇
城君投筆請纓紆籌戎幟閉由蘇而祈歷克堅城
大吏上其功由參軍保知縣年未周甲遽挂冠歸
有感

頻年浩劫幻蟲沙腸斷西風隴上笳客路塵容人易老天涯
鄉信夢俛餘前歡空有歸來鶴繞市猶驚結陣鴉浪迹張融
舟不繫江湖泛宅慣浮家

吳肇嘉

號味根秀水人著
雙涇書舍詩彙

范少伯祠前明萬歷十年龔太守勉所創二百餘年歸

然無恙庚申之劫鞠爲茂草茲里人鳩資重建經始
於壬午孟春越七閱月而告成喜勝地得復舊觀并
見諸君子之興廢舉墜有足風焉率賦二律誌幸

名勝追尋步轉遲城西寂寞范蠡祠窗含秋水邀凌唱閣枕

斜陽鎖柳絲，敵國謀成泛烏榜。美人仙去，賸燕支興亡，莫漫悲前事。隔岸清風，尙昔時。

一自鴛湖譜棹歌，百年重唱奈愁何。溪頭謝卻千絲網，水底空傳五色螺。粉雉雲歸新畫棟，蒲牢風冷舊金陀。可憐今古無陳迹，獨立蒼茫感慨多。

汪樹基

字蓮溪
平湖人

春日郊行

春氣芳郊徧，行吟度石梁。林花明遠岸，山翠落橫塘。水暖魚苗出，泥香燕子忙。蒼茫雲樹晚，歸路踏斜陽。

馬蘭芬

字蘅垞
桐鄉諸生

冬夜讀韋左司詩

殘雪明高樹，孤燈耿羅幃。忍寒靜無寐，獨坐思依依。偶攜左

司詩讀之忘塵機如登秋山巔涼翠撲我衣如遇雲中君咳
吐皆珠璣詩境何微妙清氣得者稀夜深更漏歇冷月流素
輝驚連凍樓禽拍拍梅梢飛

嚴錫康

字伯雅桐鄉人江蘇候補知府著發花室

林則徐序略伯雅少有志也丁未夏余督師來漢時曹掾於應
舉從軍事非其志也丁未夏余督師來漢時曹掾於應
奏轉餉識獄於事皆辦金戈鐵馬不輟吟詠詢能吏而
兼詩人者敘功除寶甯令加郡丞秩改官黔中位業始
未可量爲人清和簡貴不尙雕飾詩亦如之其辨香元白久矣
吳存義序略余癸卯視學至滇嚴生錫康執費詩業流
澗無閒其詩才清拔用力尤專不屑汲汲於語俗亦未
嘗沾沾於摹古故能春容和雅自抒性靈不涉庸音
不參偽體詞則清疏婉約嗣響玉田足與其詩並爽
孫德祖跋略光緒丙子伯雅由太湖聽同知遷秩知府
見之京余時在京兆張夫子幕始與論交以同出秦興師門
忘年相契每及知己之感涕下沾襟其篤於風誼不數
見也餐花室槩時已刑行此本猶其手贈者十年離索
山河閒之偶一披吟如與故人把酒論文於黃塵十丈

中而此境不
可復得矣

雜詩

白雲在南山悠悠不欲出東風挾之行爲霖潤萬物出山本
無心在山殊閒逸出處各有因時哉勿可失

自南潯夜歸烏戍

一條兩條小港十里五里平橋明月不離花浦好風只送蘭
橈

漁火一星古渡寺鐘幾杵荒村篷底閒鷗同夢竹閒老鶴磨
門

釣臺

不媿神僊壻桐江把釣來從龍讓諸將圖畫到雲臺

竹王祠

錦石岡前路靈祠祀竹王春山紅樹合古徑碧雲藏叢篠凝
寒翠疏鐘遞夕陽蠻童來報賽蒹葭薦馨香

黃陵廟

千古湘君廟羣鴉噪夕陽靈旗山鬼擁寶瑟楚巫藏環佩儀
仍肅蘅蕪水亦香九疑峯不斷相對色蒼蒼

黃金臺

霸業多銷盡荒臺獨壯觀千金求士易一劍復仇難落日平
沙遠春風易水寒憐才當代少我亦慕燕丹

歲暮書懷四首

錄一

重作天涯客茫茫計總非逢人青眼少擇友素心稀宦況餘
詩卷家風憶釣磯瞻雲差自喜依舊傍慈暉

太傅林文忠公輓詞四首

錄一

離江寇盜正披猖

聖主新資作保障文武才兼裴晉國安危身繫郭汾陽何堪
碧落騎箕早莫慰蒼生望澤長此去也應遺恨在櫓槍未及
掃蠻荒

鄭兆鼎

字梅士桐鄉人
官山西主簿

獲鹿道中

客過隨飛鳥周迴繞亂山雲低晉陽樹雪壓井陘關戰伐餘
荒壘悲歌動壯顏往來燕趙地今古幾人閒

脩武卽事

驅車西去近函關石子雷碾道路難萬里寒蕪迷古驛半林
紅葉露秋山流泉有韻清琴在野戍無人畫角閒回首南飛
幾行雁涼風空逐馬班班

吳鉉堂

字雪坡桐鄉人
著棄餘偶存草

冷廬雜識雪坡少嗜爲詩出語清俊家貧不肯事顯宦
有招之者詠燕以見志云社日重來覓舊巢一雙飛處
傍花梢莫誇王謝門庭好恐被平常百姓嘲晚年益
肆力於詩斗室澗吟蕭然自得無儋石儲不願也

游破石東西兩山

紫藤花外嘯暮禽碧雲寺前數峯陰雲根倒插下無際絕壑
奔流泉水深夕陽欲落猶未落何處炊煙出茅屋槎枒怪石
立如人一路寒聲響叢竹

閱

珏字仲玉號荆山烏程
諸生著樸園詩草

自題白耕樓

經營自在煙霞外溷迹何妨塵市中獨倚小樓吟不倦隔溪
雲樹入簾櫳

酌來一掬茗川水洗盡詩腸萬斛愁欲問先生歸宿處夕陽

芳草讀書樓

袁秉彝

字孝宰，歸安廩貢。善鐵虬山人集。

縣志：秉彝少孤，食貧力學，早歲擅詩名。事母尤孝，滌中幫廁，踰皆自任之。

清明感賦

東郊乍可踏春行，獨上高樓無限情。
千里兵戈方擾攘，百年風日幾清明。
英雄失意垂垂老，草木逢時漸漸生。
卻歎禁煙當此節，如何烽火照連營。

凌丹陛

字叔辰，歸安人。著六梅書屋詩集。

借諸友過止止亭步月

茆亭帶山翠，清襟迎夕涼。
素心二三子，可以同周行。
流雲如人意，吐茲明月光。
何必北窗下，浩然論羲皇。

南陽留別姊丈鄭小時刺史

驅車宛徂路迢迢憶赴衙齋論久要作客好仍依骨肉首途
還得看金焦襟懷已自期千古風月無妨付一挑未免臨歧
情話切坐殘寒漏燭頻燒

重赴杭州

一天風雨送征橈路指西泠百里遙鴻爪擬尋前印迹柳枝
應長舊攀條年華流水消青鬢蹤迹浮雲寄紫霄廿載煙波
看不厭銀濤又覽浙江潮

上洞庭山

半生棲處近林巒檢點琴書又入山下榻漫勞新地主開窗
仍對舊煙鬟娛人春色花千樹照眼清暉水一灣祇是相知
半蓬梗未能朝夕共追攀

訪山居寺

何處一鐘鳴尋聲乍意行徑隨松影曲門對石泉清寺古全
無佛僧閒半學耕新茶沿路採歸去喚僮烹

張

炘號敏齋又號萍菴歸安
諸生著養拙齋詩鈔

練市紫藤

託根餘百年垂蔭可三畝橫天飛翠虬帖地臥蒼狗市門晨
氣涼溪路午陰陡惜未及花時紫雲捧一斗

蔡鴻鑑

字季白鄞人候選員外郎
著二百八十峯草堂詩藁

春江曲

春風紅遍桃花鴨春波綠過楊枝渡桃花鴨邊無數春楊枝
渡頭愁煞人有客泛春上酒船雙橈劃破鏡中天天光倒影
不可卽江月依依照顏色

蛟門

日落蛟門白嵐光挹太清潮聲吞大壑暝色壓孤城島嶼遙
無際雲霞斂不明蓬萊如可渡不用賦長征

黃鶴樓題壁

三楚南來第一樓仙蹤韻事兩悠悠一從騎鶴人歸後笛冷
梅花幾度秋

嶼嶼螺洲夕照荒孤霞一片水中央隔江催到漁舟笛驚斷
平沙雁幾行

孫康友

字伯安慈谿諸
生簪雪齋詩草

過沙蘿菴

向晚來尋水際涼滿湖菱葉掩波光遠峯日落迷樵徑古澗
橋橫接講堂閑裏坐參禪味淡靜中愛聽梵音長爲言九節
菖蒲好更借僧鋤劔石旁

胡

邁

字凌伯濱
子鎮海人

望海

登高滄海闊遠景豁眸開山逐回潮去帆如走馬來天風挾
飛舞鳥影恣盤迴那得佺喬侶高歌共酒杯

野望

蕭條當薄暮獨立酒微醺古寺藏脩竹奇峯插亂雲停車因
落葉著屐對斜曛又見東臯外風寒度雁聲

孔廣森

字曉園象
山諸生

蓬萊山尋陶宏景丹井

仙之人兮在蓬島九轉丹能駐顏老未從天上索瓊樓且向
人間覓瑤草蓬萊萬仞東海東石色盡作流霞紅南朝隱士
此修煉玉煙拭壁多蘭芎千年去鶴不重返遺井但有蒼苔

封我來策杖拾層級石氣氤氳繞衣入回頭但覺萬山空
首難容一瓢挹當年遷竈由青樟朮丸菌脯資爲糧佛狸江
壘火重沸託此信是華胥鄉鑿流洗藥石同煑明月滿屋松
風涼至今纒朽餅都墮亂礫纏蕪積砌礪葛鄉彭宅共留名
耿拜灌銘徒瑣瑣蒼茫弔古還鬱伊寄夢紅塵多是非何堪
汲得清溪水但養荒園苜蓿肥

置酒高堂上

年華一以逝富貴同蜉蝣費我千萬金難使桑榆留哲士戒
殉荒達人謀遺憂青樽方悅春白髮旋驚秋潭潭高堂上賓
客羅豪儔環花若雲委傳醴如霈流舞態燕慚媚歌響鶯奪
柔時良樂無竟神倦興未休安知方丈筵明日非山邱絲絲
續茲曾身外還何求

金烈婦詩

鴟鴞鴟鴞嗥屋聲碎鴉乎何冤鴟請臆對東鄰有烈婦十七
 執箕帚姑行醜門生莠姑啗婦金婦不受以刀截指誓死守
 鞭之烙之婦甘如飴阮以荆棘遑顧寒飢壻客海島杳無還
 期姑毒肺腸謀沃沸湯隆隆雷起乃傾其鎗皇天怒矣厥奸
 露矣鄰瞰姑匹脫禁錮矣牒申縣官三木具矣眾曰嗟奇冤
 雪婦曰嗟死期迫婦生宏景山婦嬪德潤里大義知懷持身
 命猶敝屣事繫咸豐初撫實告彤史姑姓龔婦姓李人中之
 鴟夫已氏

歐景岱 字仲真一字仲貞象山人候選員外郎

董沛曰仲真生平服膺姚姬傳所作古文不失桐城家法盡五年之力誦十三經注疏點勘二十四史故學有本原迥非碑販餘事為詩亦駸駸入古

庚申十一月十七日偕友人遊西滬海山以摩詰詩高
情浪海嶽浮生寄天地十字分韻得高字

挈朋赴遊約氣煖微風捎層雲曠天台層景亭午韜靈境闢
幽邃眾象炯難逃巖巒盡趨拱星斗皆羅包迴空瀉篁氣走
峽喧蘭濤鼓君鳳皇瑟振我芙蓉袍去水逝疇挽此柱砥能
牢珥筆凌謝客拾級追盧敖寥廓旣延挹衆座開醇醪此會
足千古何必蓬萊高

金烈婦詩 并序

烈婦李氏象山人適慈谿金氏子姑龔暱里僧湯湯
闕婦美以百金啗其姑並置金釵華服投婦婦斷指
自誓姑日以鞭捶火烙脅之且掘密室作竊錯以瓦
礫荆棘綈婦箝中上蒙以板僅可出手置冷餒一盂

俾自攫食其夫方捕魚海上未歸故無知者媼是雨
月餘值夏日蚊嚙鼠齧血肉狼藉體無完膚終不屈
乃與湯謀夜半以沸湯沃殺之聞雷聲繞屋懼而止
鄰里乘其姑出約眾入室以門扇舁婦至縣堂鳴其
冤讞既實婦遂死於縣庭時咸豐三年八月二十日
也年十九云在金氏者三年慈人葬其棺於慈湖側
爲之立碑

授節不授恥烈女如烈士皎皎慈湖流明月天上頭蛾眉惜
明珠春風開羅襦蛾眉作貞耦空牀甘獨守玉可碎非可玷
絲可斷非可染淫姑肆威貞姑難期楚江千里小姑獨指風
濤澎湃一拳不移噫噫吁春能主桃花淚落豐碑樹共拜蚩
城李家女

南田篇弔張忠烈公

南田界象南較象大居半沿革溯宋元回浦隸鄉貫泊自朱
明興洲島撥叢亂遂禁民居山遷徙絕薪爨禾黍積莽榛巖
嶼錯圩埤傑哉湯信公握籌有成算似識三百年當來義師
竄吾郡蒼水公英毅等曹冠甲申京師陷憤起挽狂瀾瓜步
初進師戈矛礪乃鍛蕪湖繼登城旗幟奪防扞孰意延平藩
督練殊怯偃同仇非腹心一挫輒背叛反俾單弱軍整旅作
絳灌成敗旣異形寤寐深扼腕霍山困奔走踵裂頭亦汗劇
覺行路難行行抵鄉閭原非黃冠旋聊作遊汗漫滄洲暨缸
日禁山名跋涉苦昏旦遂入甌瓦門窮棲謝羈絆奴養援一雙
出入警鳴喚託此無糧區版籍不能按孤忱效采薇餓作首
陽看不知

天戈揮翼翼下飛翰日出罔率俛河海詎清晏搜擣窮其區
方等不庭榦六位共占空原早識爰豸成仁古所難取義今
已斷官爵不能糜刀鋸非所惋舉首好山色正氣肅嚴憚但
瞻明社屋菴比中谷煥嗟嗟公雖死讀集尙薰盥回望洪濤
中佛山卓天漢

翠竹軒新築露臺同人小集次大梅山館集露臺坐月
詩元韻

縹緲步虛歌紅牆隔絳河涼風秋未至明月夜先多遠海孤
飛雁晴巒百柄荷美人不可見橫瑟見微波

楊花曲

楊枝軟如絲千絲萬絲春江邊楊花白如雪歲歲春江送離
別春來春去君不知妾心亂似楊花飛棉花五月黃麥花二

月芒楊花不管衣與食但伴愁人可憐色君不見畫樓百尺
楊枝齊楊花落盡鶯不栖日暮但有烏鴉嘯

范榮棣

字椒邨錫惠子會稽諸生著蕪菊軒詩二卷

孫德祖曰椒邨少孤力學博通經史年未三十
破婦周亦工吟咏有閨中唱和集以生存不錄

讀宋史趙普傳

盟渝金匱非臣節金受錢王負主知猶喜薦賢能補牘孤寒
生恨不同時

歲暮寄沈翼心 鏡攄

茅龍衣認孝然廬花著寒梅逼歲除霜重板橋星漫戴風嚴
荒圃月難鋤尋常有債非關酒儋石無儲尙攤書落魄年年
空作賦千金誰爲問相如

秋暮送翼心之漁渡

酌古斟今酒一卮西風蕭瑟別離時山曾招隱留叢桂菊爲
凌霜有傲枝浮世交情今日見嘔心文字古人知如君得一
應無恨欲謝襟期空寤思

自遣

風雨江邨賸一椽藥爐茶竈度華年無多恆產惟心地亦有
生涯在硯田難得梁鴻夫婦隱儻教陳實子孫賢家人容我
占无咎莫問中流士雅鞭

春暮寄內

旅食年年慣題書強自寬病多催老易家近欲歸難賣賦行
囊盪傷春夜雨寒枝頭問梅子知否客心酸

有感

豪氣銷沈阿堵中漫將心事問東風由來畫餅充名士未抵

求田問舍翁

沈兆圻

字叔琪光廔仲子會稽人嘗夢花山館詩文鈔

家傳器叔琪少作詩筆壯歲激於時事感漑蒼涼有足觀者名其所作曰蘭陽草尤善古文博覽經世之書決疑定難成效深著使天假之年所造豈止於斯

梅山懷古

在光孝寺後相傳漢梅福曾隱於此

勘破人間名利關
閒雲野鶴渺難攀
上書北闕曾無補
一去南昌竟不還
敢爲神仙輕簿尉
拌將事業付湖山
我來已隔三千載
木自森森鳥自閒

九日登烏石山

身世眞同不繫舟
無端漂泊又深秋
瀟瀟雨比思親淚
瑟瑟風增異地愁
我似孟嘉空落帽
誰憐王粲獨登樓
籬邊黃菊猶如許
前度新詩記也不

去年九日登烏石山詩云我爲登高歲歲來籬邊黃菊應相識原稟

散失不能
盡錄附記

感懷

蹤迹頻年似鹿盧居然牛馬聽人呼風塵逐逐家何在臘鼓
聲聲歲欲徂肯以浮名鑄傲骨曾無實學展雄圖何時鑑水
酬歸夢焚棄儒冠作酒徒

冬日閒居

謀生自覺才名淺多病常教故舊疏買藥衝寒晨入市栽花
和月夜攜鋤一年領畧閒居賦千里頻修卻聘書病中凡六
卻故人之
聘
寄語尋常休冷齒袁安高臥更何如

陶在廉

字公威慶章子會稽
人著詠物詩一卷

殘菊

繞籬料理足清歡冷峭西風瘦蝶團綠酒初醒愁鬢短黃金

垂盡耐霜寒，閉門清供留佳種。有客騷憂尚夕餐，檢點芳菱重護惜。明年猶待醉中看。

王再增

字亞山，蕭山人。江蘇候補巡檢。

舟泊平望看花僧寺有作

登臨卽此是蓬萊，有客尋芳獨往回。怪石爭奇迎面立，落花無語打頭來。綠陰滿屋琴三弄，紅袖當筵酒百杯。我比浮雲閒更甚，夕陽西去尚徘徊。

孫樹雲

號又樵，餘姚諸生。簪友竹軒詩案。

壽朱久香閣學 七十

和平敦厚養天真，僥倖今人見古人。鸞掖文章聲價舊，龍門讌會嘯歌新。時會耆英於環翠樓。花迎白傅飛雲履，樹憩林宗墊雨巾。俗漸還淳行漸遠，好風何止一家春。

許炳森

原名傳震字竹安正綬子上虞生著一樓管詩文草

袁樸曰君爲齋生先生哲嗣幼秉庭訓學有本原與余居同里閑仇爽士也

丹陽城東弔張忠武公

日落大星催將軍去不回江山餘故壘風雨暗荒臺碧血寒
流逝紅旗捷報來英魂猶殺賊忠勇到今推

許傳囊

字子承號竹清炳森弟上虞廩貢候選訓導著雙瑞竹館吟草

許傳需曰兄性曠達敦友誼少遭兵亂徙居淮北爲常道記室南旋應試屢躓敘學官非素志也司訓歸安武康湖人士謂我先人教澤足以繼起近與采輯軒輳編且議續先輯兩浙校官詩錄未集事竣於杭士林惜之

遊銅山寺喜瞻前明周忠毅公

宗建

判書真蹟長卷敬

題卷後

名山符領物有主苟非我有戒勿取何來宦豪強肉弱坐使

精藍遭侵侮卓哉周公膽智全維民父母比召杜巢鵲不許
暫占鳩城狐豈容威假虎遂使侵田返汝陽並令明珠完合
浦手書判牘歸寺僧森嚴鐵案足千古明季貂璫毒饒張如
公正直中流柱疏劾權奸事未成浩氣已堪塞寰宇此判雖
然技小試披卷早服公神武我聞當年蘇玉局判事冷泉德
施普曾留玉帶鎮山門軼事猶能道牧豎斯事斯判得毋同
其寶藏之珍珠珎

馬化南

字亦煥號帶棠岷
廩貢署象山教諭

象山學署作

并序

象無訓署署於姜忠肅公祠祠公子圻令象時所建
也乾隆閒吾岷周公熙文司訓象山撥助祠田另營
訓署同治己巳余分纂岷志列周公宦蹟本周氏譜

曾及此事同人據毛西河說註其下謂無圻令象事則象不得有忠肅祠而周公事蹟亦子虛矣嗣余司諭龍泉得象邑公田記事一本考据鑿鑿因錄簽周傳爲後來改註計不知象邑田記何以在龍泉又不料余之由龍而入象也豈有前定耶冷署無事詩以誌感

昔年纔自劍川還似有前因到此閒空負遺風傳絳帳那能化雨及丹山冷官無氣才原拙佳客不來門自關幸爲同鄉徵舊蹟旁參說註好從刪

裘錦章

號書堂
嵯諸生

弔李給事化龍

野火燎原玉不焚秋風吹草竹不裂國祚將終士氣頹小李

鐘鐺面如鐵漢廷痛哭買長沙報國忠謀肝膽瀝吾謀不用
挂冠歸身在田閒心魏闕從此中朝事日非杜鵑叫落燕山
月白馬青絲動地來枕戈待旦呼天切

聖朝爲復故君仇手挽天河洗兵甲普天率土樂爲臣獨有
孤臣完晚節不愛頭顱大義伸笑含地下朝莊烈地老天荒
心不磨陵遷谷變名難滅憑仗遺民話舊聞列傳補將青史
缺夜雨青燈濁酒盃爲公招魂歌一闕歌成漳水增嗚咽中
有侍中一斗血

遼山紀行

遼城高踞太行頂舉頭呼吸通杳冥

母賦切

東去蜿蜒十八盤

北來磊砢松千嶺高山羅列似兒孫漳河倒浸芙蓉影山鳥
啁啾不識名野花開落無人境仄徑纒容一騎過枯藤愁見

孤猿引一峯未盡一峯生絕磴危梯如接軫不信人閒蜀道
難毛髮蕭疏意懍懍驚魂不定粟生肌炊煙喜見人家近一
盞村膠槐葉餐三尺繩牀明月枕故山有約不歸來夢裏微
聞元鶴晒

支廷玠

字舜梓號琢如岷諸生

鄭錫蘭曰琢如少負俊才善屬文兼精音律算術詩下
多作然如春風坐我剛三月秋雨懷人又五更蕩江風
味偏宜夜游子光陰半在
船情韻詎減漁洋山人耶

奉呈錢甦門先生

幽居頗清絕雲樹鎖重重何幸鄙人宅得邀先輩蹤杯傾三
雅酒莊間百年松不盡區區意贈言尤我宗

先生力應寒宗之聘爲精修宗

譜

周紀勳

字銘二號荷軒又號石顛岷諸生江西候補縣丞著桐陰吟稿

呂岳孫曰石顛性情真摯敦孝友重義氣鄉黨稱之善
讀書與官野史無不畢覽古文甚雅馴詩尤沈摯其精
警處直逼陳黃門中年入賞得微
官未任而卒著有剡中所見續錄

支琢如招集望湖樓李少青張子翔湘浦家曉徵呂越

嶠同作

霄漢瞻佳士杜詩才是謫仙別來重九日忽漫小春天湖水

清如許霜林紅欲然高樓一憑眺暮色起炊煙

上巳後六日借黃月峰支琢如袁升甫張谷賓陳谷香

丁益甫泊同社諸子謁戴仰若墓至明心寺茶話序

齒分韻

招朋尋勝蹟春色滿山村柑酒風千古鶯花人九原疏鐘更
何處深寺不知門放浪容吾輩歸途樹色昏

周

誥字曉微廬謹堂乘誥
生箸石鼓山樵詩鈔

呂岳孫曰曉徵警敏不羣博學有才辯古文神似邵子湘能屈曲以副人意詩清新婉約年未四十卒

讀史

無賴一朝作天子功狗盡朱紫周室分封同姓先兒子
如何後雍齒太上皇意不可傷羹頡侯封聊以償乃翁之羹
猶足食邱嫂之怨何能忘吁嗟乎英雄意氣古無比區區只
爲一餐耳家人骨肉都無情何物韓彭能不死我作詩歌問
史臣豁達大度詎如此嗚呼豁達大度竟如此

秋怨

涼月多情甚深宵上畫欄何曾似明鏡照見妾心難

詠史

至人獨不朽不朽非形骸愚人慕長生長生願終乖咄哉秦
皇與漢武欲作神仙輕九五國亂民愁宗社墟縱使成仙亦

奚取樓船一去不復還。瑤草蟠桃究何許。茂陵風雨巖山火。
千載哀哀號杜宇。嗟乎人生百歲空。自好安得萬年長。不老
羸亡劉蹶劇堪憐。不料後人尤草草。君不見蕭家天子亦英
物不學神仙乃學佛。

歲杪感懷

風景蕭條逼歲除。一燈相對黯愁予。那堪親老常爲客。敢以
家貧便賣書。涼月雁慵音信斷。寒林鶴病酒杯疏。明朝擬返
西溪棹。白髮殷勤正倚闌。

義犬行

并序

辛酉之變。被害者狼籍於道。強半飽犬腹。族子恩祐
畜一犬。雄偉異常見。祐被害日夕臥其旁。他犬來必
奮力與角。飢則茹路旁草。或自食其矢。以故祐屍獨

無恙賊退祐子歸覓父屍不得遙見犬始識之呼之
餓不能起蓋已一月餘矣嗚呼犬耳顧若此哉爲賦

義犬行

豺狼當道虎豹避社鼠城狐肆無忌天生萬物人爲貴大義
誰知存異類咸豐辛酉十月冬黃巾百萬來洶洶殺人如麻
委道路血肉狼藉天無容青天白日聞鬼哭有犬咆哮食人
肉生前不獲還鄉閭一死卻教歸犬腹吾宗有犬犬而人死
抱髑髏聲狺狺忍飢不與羣犬伍力護主軀酬主恩主人有
子不如犬父權兇刃兒獨遠主人有犬勝如子生旣追隨死
猶視惜哉能言非猩猩此際冤苦難分明君不見明皇舞象
何昂昂不拜祿山殉君王又不見昭宗弄猴孫供奉奮擊朱
溫何其勇渠非人類知人倫慷慨激烈忘其身此犬對之庶

無愧韓盧宋鵠焉足論嗚呼賤畜人不齒大義鏗鏗猶若此

張

綺

字子霞號默齋臨海諸生著九峯山房詩彙

蔡旒序畧先生稱詩鄉里間垂數十年長歌短謠筍束林立丁卯歲訪予於東湖書院野服扶杖于然來談次誦所作琅琅可聽明日以詩集來時將北游肩置行滕往還數千里未著一字比還里又以居憂廢筆現閣三載予復客郡城先生則老態益增詩興猶昔別著默齋詩話若干卷江湖遺逸桑梓舊搜輯不遺餘力郡伯蘭洲劉公方有湖志乘默齋之書其足為鄉邦文獻之助者多矣黃瑞曰子霞居郡東之馬山頭窮老攻詩名不出閭巷平生無他嗜惟以吟詠為職業卒年七十有八臨海詩錄默齋苦吟七十年人無知者吾友黃君子珍錄其佳者掄揚以廣其傳今讀其所為詩清遠疏秀於元人為近似

橫溪謠

有序

橫溪者余村西溪名舊有廟上通百丈梅嶽箬嶺芝嘉山寒錦岡泥壁嶺張家田諸澗水夏秋閒積雨暴

漲溪上田多被淹道光甲辰余與族人植柳兩岸年來濃蔭蒼蔚田亦藉之爲衛賦此誌喜

九峯山下百丈水溪流滄滄石齒齒垂楊夾岸綠成陰幾多樓閣濃陰裏樓高傍山閣傍溪溪光山色相映齊煙花三月東風暖黃鸝怡怡鵲飛橐駝書讀余心愜樹護溪田沙不齧牛羊徧野桑麻鋪牧童隊隊歸橫笛溪通山遠漑田足菰蒲過雨新漲綠持竿日日坐溪頭烹鮮供客春缸熟春缸熟柳陰深處張融屋

葛晚園

臨海人

雙硯齋筆記葛君晚園臨海賣菜傭也族叔葦邨先生物色得之知其遠於易理延爲邑社講說黃以罔序畧葛君晚園隱於圃又賣卜於市事少閒卽玩身不較手晚有所得著易學辨說一書周讀其說而題之惜葛君已垂老矣然無待而興亦豪傑士哉

自述

巾山山下路茅屋本吾家野市尋生活空江老歲華一畦庾
信菜五色邵平瓜靜悟盈虧理無錢酒許賒

葉啟楨

字商舟金華人
著醉六齋詩草

葉翌曰商舟季弟性孝友母病焚香叩天
願以身代月餘母愈而弟死年僅十八

不寐

旅館淒清極寒宵斷遠更關山千里夢風雨一時情注酒非
忘世攤書偶學兵故鄉何處是歸雁兩三聲

秋風詞

秋風起兮天氣寒無家客子兮衣裳單回首故鄉兮雲漫漫

張經銘

字夢馨經組弟義
烏人箸愚稼庵稟

旅夜書懷

楚奏淒清此地愁寒燈一穗影空留樓頭有酒客方醉水面
無船江自流茅店尖風蟲訴夜霜天明月雁橫秋燭奴有約
同垂淚坐到殘更尙未收

旅客

茫茫千里倦風塵花草揚州幾度春認得酒旗重駐馬當爐
仍是舊時人

程鴻達

字羽儀號秋谷永康諸生著師竹齋詩鈔

曉發

扁舟殘月冷客夢亂征蓬樹色明前浦鐘聲度遠空潮翻沿
岸雪帆飽滿江風多少關山思都消一棹中

沈寶瑚

字六玉瑞安諸生箸韞玉山館詩鈔

張家珍

孫貽穀

先後戰歿以詩哭之

宏策家風萬福名梓鄉草木識英聲籌兵豈必師孫武較藝
庸甘齒蔡京蔡逆係選拔是一死報君箴貴族半生愛客見
交情宋城墨帶今方釋蝸角器器尙待平

年少伯符甘裹革名高德祖竟凸身儒冠底合誇鼪尾文筆
原能制鱷鱗地下睢陽成死友堂前安石想斯人孫叔父葉
田奉辦團
練會須藏得萇宏血留作他年杜宇春

秋蟬

聲聲乾咽抱斜陽一樹無情惱白楊昨夜漢宮聞落葉有人
驚夢斷愁腸

林用霖

字亨父泰順諸生官福建
霞浦典史著望山堂詩續

雨霽

雲東山腰一帶白風梳石髮萬絲青樹閒日色開蓬戶竹下

溪聲上畫櫺客意慵如僧出定秋心清復醉初醒倚門閒味
杜陵句小立渾忘物我形

書溫飛卿集後

鳳閣鸞臺聲自希龍旂春色動威儀不聞蜀賦黃金換空惹
荆人白壁疑一代詞鋒仇薄俗半生禪榻契心知如何摠摻
千年怨流響餘音變愈奇

偶讀王考功丹鳳城南秋夜長之作戲和之

丹鳳城南秋夜長遙天愁思感茫茫寒砧響徹銀河動錦字
機停玉臂涼雁影一行明帶月龍沙萬里冷飛霜傷情最是
雙棲燕歲歲年年玳瑁梁

擬張景陽雜詩

人生百歲期陰陽催易老舉頭春旭溫轉瞬秋月皓涼颯颯

華鬢益信和風好佳辰不久駐寸陰宜自實矧茲清肅氣炎
濁歸淨掃感遇發清吟逸興越雲表

大地消陰翳萬象覺鮮新平林豁遠目流泉清煩氛出門覓
芳杜香氣襲裾襟小草惜菅蒯黃落委重茵回頭睹九畹蘭
蕙騰芳芬紉之以爲佩愜素如書紳爲念君子節何以葆吾
眞

南園白雲隈中有平綠疇耦耕效沮溺樂志偕林邱石泉出
東峽松入西風樓絡緯吟露梢寒蟬咽枝頭林靜觀鳥集山
深聞鹿呦釋耒遇樵語把竿隨漁倚養眞得幽趣匪爲稻粱
謀

趙

瀛

字筱峰山陰人著
初佩仙館詩詞鈔

渡江作

落葉晚蕭蕭維舟問六朝春風京口樹夜月廣陵潮兵氣傳

金柝

時法人渝盟頻海各口戒嚴

閒情付玉簫匈奴猶未滅誰是霍票姚

春初風雨經旬兀坐斗室中百感蒼茫雜然成詠

幾番芳信到梅花春入邪谿處土家茶熟香溫人定後一燈
搖夢讀南華

頻年羈旅暗心驚況復南州不解兵未必江關詩賦重白頭
愁殺庾蘭成

鄧尉探梅遇雪

衝寒全仗酒扶持多飲還妨醉不支茸帽貂裘風雪裏萬花
深處立多時

平望道中

平江東去接吳江掠水飛飛燕子雙仙犬不驚街柝靜一鉤

新月上篷窗

四圍蒼翠亂峰堆
澄碧波光曉鏡開
約采新蕪侵早起
草痕青拂畫船來

吳江夜泊

采蓮謔罷采菱謔
雲影天光水不波
一鶴南翔秋正半
夜涼

消受月明多

趙祖歡

字喜孫號蘭時會稽人廣

陶濬宣曰君穎悟絕人贈君故善繪事君童年卽竊效
之尤精篆刻精到處已幾幾超越其宗人搗叔大舍時
呼小趙以家貧宦遊嶺海非其志居三歲拂然欲歸姚
彥洙丈布政廣東極器君挽之不可君聚漢印及名人
篆刻多至五百餘方所腐不戒于火盡焉君德爽甚自
此常惘惘若有失年三十五卒子與君爲中表兄弟乙
酉冬子將北征時君病劇猶強起筮二石貽子所傳刻
石與畫其妙予近客粵往往見君所作然粵士夫爭寶
之得君一糠一石者兼金不與易也性喜潔常齋居不
茹魚肉年未冠面蒼癯如老僧自號蠟頭陀祖省國先

兩折斷紅續錄

卷四十九

趙瀛趙祖歡

五

生爲鷗社尊宿詩已著錄君著
題畫詩一卷早刻餘稟多散佚

卽景

愁來不知處無語立斜陽風月杳然去煙波如此長秋先生
白屋夢未熟黃梁贏得山林興高歌效楚狂

題畫二首

春色滿湖潯春風長白蘋雨餘新水足三兩出遊鱗
一燕花外來一燕花稍立有意話相思滿身香霧溼

立春

何處迎神鼓重驚物候新天涯猶作客異地又逢春
筍酒喧童僕評花鬧比鄰遙憐風雪裏日暮倚閭人

流鶯詞

春風吹綠隄邊柳有客攜柑酌杯酒一雙好鳥鳴嚶宛轉

似訴春風情一聲兩聲聲尙迴百聲千聲轉急絲絲蠻蠻
嘒滿枝輕於花裏飛游絲隨風颺入碧雲去一片春聲不知
處

陶熙培

字心田會稽人嘗聞游草

與友人夜話

其述平生志聯牀快不勝鐘聲流曉月花影護春燈貧賤常
如此襟懷展未曾勞勞何足怨所惜是無能

傅振湘

字炳瀟號湘秋諸暨諸生嘗存真詩鈔兩卷

傅振海曰余弟湘秋賦性高曠而幼于學研精訓詁亦工詞翰爲德清俞曲園師所激賞年僅三十有一以潦疾亡檢存遺墨散佚已多回首前歡踴然心痛

丙戌秋與黃雲襄先生重游頤園賦呈徐丈且臥

名園回首溯前游一別光陰逝水流魚鳥多情憐舊客江山

無恙感新秋圖近臨風疏柳翰青眼點雪寒蘆映白頭卻笑
傅咸疏嬾甚飛鴻爪迹未曾留